

欽定舊五代

十卷十卷
八四三四

舊五代史卷四十三

宋門下侍郎參知政事監修國史薛居正等撰

唐書第十九

明宗紀九

長興三年春正月癸未朔帝御明堂殿受朝賀仗衛如
式丁亥陝州節度使安從進移鎮延州己丑遣邠州節
度使藥彥稠靈武節度使康福率步騎七千往方渠討
党項之叛者庚寅以前北京副留守呂夢奇爲戶部侍
郎辛卯以前彰國軍留後孫漢韶爲利州節度使充西
面行營副部署兼步軍都指揮使庚子契丹遣使朝貢

辛丑秦王從榮加開府儀同三司兼中書令戊申詔選
人文解不合式樣罪在發解官吏舉人落第次年免取
文解中書門下奏請親王官至兼侍中中書令則與見
任宰臣分班定位宰臣居左諸親王居右如親王及諸
使守侍中中書令亦分行居右其餘使相依舊從之渤
海回鶻吐蕃遣使朝貢大理正張居球上言所頒諸州
新定格式律令請委逐處各差法直官一人專掌檢討
從之二月乙卯制晉國夫人夏氏追冊爲皇后丙辰幸
龍門詔故皇城使李從璨可贈太保詔出選門官罷在
後周年方詳擬議自于所司投狀磨勘送中書又詔罷

城南稻田務以其所費多而所收少欲復其水利資于
民間碾磴故也秦州秦州界三縣之外別有一十一鎮
人戶係鎮將徵科欲隨其便宜復置隴城天水二縣以
隸之詔從之甲子幸至德宮以右衛大將軍高居貞爲
右監門衛上將軍庚午以前華州節度使李從昶爲左
驍衛大將軍以前夔州節度使安崇阮爲右驍衛上將
軍以前新州節度使翟璋爲右領軍上將軍以右領軍
上將軍羅周敬爲右威衛上將軍辛未中書奏請依石

經文字刻九經印板從之

五代會要長興三年二月中書門下奏請依石經文字刻

九經印板敕令國子監集博士儒徒將西京石經本各
以所業本經廣爲鈔寫仔細看讀然後僱召能雕字匠

人各部隨帙刻印板廣願天下如諸色人要寫經書並請依所印刻本不得更使雜本交錯愛日齋叢鈔云通鑑載後唐長興三年二月辛未初令國子監校定九經雕印賣之又曰自唐末以來所在學校廢絕蜀毋昭齋出私財百萬營學館且請板刻九經蜀主從之由是蜀中文學復盛又曰唐明宗之世宰相馮道李愚請令判國子監田敏校定九經刻板印賣從之後周廣順三年六月丁巳板成獻之由是雖亂世九經傳布甚廣王仲言揮塵錄云毋昭裔貧賤時嘗借文選于交遊間其人有難色發憤異日若貴當板以鏤之遺學者後仕王蜀爲宰相遂踐其言刊之印行書籍創見于此事載陶岳五代史補後唐平蜀明宗命太學博士李鏐書五經仿其製作刊板于國子監爲監中刻書之始猗覺寮雜記云雕印文字唐以前無之唐末益州始有墨板後唐方鏤九經悉收人間所有經史以鏤板爲正見兩朝國史此則印書已始自唐末矣案柳氏家訓序中和三年癸卯夏鏤輿在蜀之三年也余爲中書舍人旬休閱書于重城之東南其書多陰陽雜記占夢相宅九宮五緯之流又有字書小學率雕板印紙浸染不可盡曉葉氏燕語正以此證刻書不始于馮道而沈存中又謂

板印書籍唐人尚未盛行爲之自馮瀛王始印五經自後典籍皆爲板本大槩唐未漸有印書特未盛行後人遂以爲始于蜀也當五季亂離之際經籍方有託而流布于四方天之不絕斯文信矣 甲戌靈武

奏都指揮使許審環等謀亂伏誅藥彥稠奏誅党項阿埋等十族與康福入白魚谷追襲叛黨獲大首領六人諸羌二千餘人孳畜數千及先劫掠到回鶻物貨詔彥稠軍士所獲並令自收勿得箕斂已卯以前河中節度使索自通爲鄜州節度使懷化軍節度使李贇華進契丹地圖詔司天臺除密奏畱中外應奏歷象雲物水旱及十曜細行諸州災祥一一並報史館以備編修壬午藥彥稠進回鶻可汗先送秦王金裝胡鞞爲党項所掠

至是得之以獻帝曰先詔所獲令軍士自收今何進也
令彥稠卻與獲者三月甲申契丹遣使朝貢靈武軍將
裴昭隱等二人與進奏官阮順之隱官馬一匹有司論
罪合抵法帝曰不可以一馬殺三人命笞而釋之丙申
西京奏百姓侯可洪于楊廣城內掘得宿藏玉四團進
納賜可洪二百緡絹二百匹庚子以前鄆州節度使孫
璋卒廢朝癸卯帝顧謂宰臣曰春雨稍多久未晴霽何
也馮道對曰水旱作沴雖是天之常道然季春行秋令
臣之罪也更望陛下廣敷恩宥久雨無妨于聖政也丁
未以神捷神威雄武廣捷已下指揮改爲左右羽林軍

置四十指揮每十指揮立爲一軍軍置都指揮使一人
庚戌帝觀稼于近郊民有父子三人同挽犁耕者帝閱
之賜耕牛三頭高麗國遣使朝貢以右領軍上將軍翟
璋爲右羽林統軍以前安州留後周知裕爲左神武統
軍夏四月甲寅詔諸道節度使未帶使相及防禦團練
使刺史班位居檢校官高者爲上加檢校官同以先授
者爲上前資在見任之下新羅王金溥遣使貢方物戊
午中書奏準勅重定三京諸州府地望次第者舊制以
王者所都之地爲上今都洛陽請以河南道爲上關內
道爲第二河東道爲第三餘依舊制其五府按十道圖

以鳳翔爲首河中成都江陵興元爲次中興初升魏州爲興唐府鎮州爲眞定府望升二府在五府之上合爲七州餘依舊制又天下舊有八大都督府以靈州爲首陝幽魏揚潞鎮徐爲次其魏鎮已升爲七府兼具員內相次升越杭福潭等州爲都督望以十大都督府爲額仍據升降次第以陝爲首餘依舊制十道圖有大都護請以安東大都護爲首防禦團練等使自來升降極多今具見在具員依新定十道圖以次第爲定從之契丹累遣使求歸扎拉特哩袞等幽州趙德鈞奏請不俞允帝顧問侍臣亦以爲不可與帝意欲歸之會翼州刺史

楊植罷郡至闕帝問其事奏曰此輩來援王都謀危社稷陛下寬慈貸其生命苟若歸之必復向南放箭旣知中國事情爲患深矣帝然之旣而遣哲爾格錫里隨使歸蕃不欲全拒其請也詔贈皇后曹氏曾祖父母已下爲太傅太尉太師國夫人淑妃王氏曾祖父母已下爲太子太保太傅太師國夫人壬戌前樞密使驃騎大將軍馬紹宏卒癸亥以懷化軍節度使李贊華爲滑州節度使初帝欲以贊華爲藩鎮范延光等奏以爲不可帝曰吾與其先人約爲兄弟故贊華來附吾老矣儻後世有守文之主則此輩招之亦不來矣由是近臣不能抗

議甲子以太子賓客蕭遠爲戶部尚書致仕乙丑以天
雄軍節度使宋王從厚兼中書令辛未以幽州節度使
趙德鈞兼中書令五月壬午朔帝御文明殿受朝詔禁
網羅彈射弋獵丁亥以二王後前詹事府司直楊延紹
爲右贊善大夫仍襲封鄒國公食邑二千戶丁酉以太
子太師致仕孔勅卒廢朝興元奏東西兩川各舉兵相
持甲辰以文宣王四十三代孫曲阜縣主簿孔仁玉爲
兗州龔邱令襲文宣公戊申襄州奏漢江大漲水入州
城壞民廬舍樞密使奏近知兩川交惡如令一賊兼有
兩川撫衆守險恐難討除欲令王思同以興元之師伺

便進取詔從之六月壬子朔幽州趙德鈞奏新開東南
河自王馬口至淤口長一百六十五里闊六十五步深
一丈二尺以通漕運舟勝千石畫圖以獻甲寅以權知
高麗國事王建爲檢校太保封高麗國王丁巳衛州奏
河水壞隄東北流入御河戊午荆南奏東川董璋領兵
至漢州西川孟知祥出兵逆戰璋大敗得部下人二十
餘走入東川城尋爲前陵州刺史王暉所殺孟知祥已
入梓州辛酉范延光奏曰孟知祥兼有兩川彼之軍衆
皆我之將士料其外假朝廷形勢以制之然陛下苟不
能屈意招攜彼亦無由革面帝曰知祥子故人也以賊

臣間諜故茲阻隔今因而撫之何屈意之有由是遣供
奉官李瓌使西川賫詔以賜知祥詔以霖雨積旬久未
晴霽京城諸司繫囚並宜釋放甲子以大雨未止放朝
參兩日洛水漲泛二丈廬舍居民有溺死者以前濮州
刺史武延翰爲右領軍上將軍前階州刺史王安贄爲
左千牛上將軍金徐安頴等州大水鎮州旱詔應水旱
州郡各遣使人存問秋七月辛巳朔以天下兵馬元帥
尚父吳越國王錢鏐薨廢朝三日丙戌詔賜諸軍救接
錢有差戊子正衙命使冊高麗國王王建靈武奏夏州
界党項七百騎侵擾當道出師擊破之生擒五十騎追

至賀蘭山下己丑兩浙節度使錢元瓘起復加守尚書
令青州節度使王晏球加兼中書令秦鳳充宋毫潁鄆
大水漂邑屋損苗稼夔州赤甲山崩壬辰以前太僕卿
鄭績爲鴻臚卿以前兗州行軍司馬李鱗爲戶部尚書
乙未福建節度使王延鈞進絹表云吳越王錢鏐薨乞
封臣爲吳越王湖南馬殷官是尚書令殷薨請授臣尚
書令不報戊戌太子賓客李光憲以禮部尚書致仕己
亥以前靈武節度使康福爲涇州節度使幽州衙將潘
杲上言知故使劉仁恭于大安山藏錢之所樞密院差
人監往發之竟無所得以皇子西京畱守京兆尹從珂

爲鳳翔節度使廢鳳州武興軍節制爲防禦使并所管
興文二州並依舊隸興元府丁未以門下侍郎兼吏部
尚書同平章事監修國史趙鳳爲檢校太傅同平章事
充邢州節度使詔諸州府遭水人戶各支借麥種及等
第賑貸八月辛亥青州節度使王晏球卒廢朝二日以
利州節度孫漢韶兼西面行營招討使甲寅以前振武
節度使張萬進爲鄧州節度使己未以鄆州節度使房
知溫兼中書令移鎮青州丙寅以宰臣李愚爲門下侍
郎平章事監修國史癸亥以湖南節度使馬希聲卒廢
朝己卯吐蕃遣使朝貢九月壬午以鎮南軍節度使校

校太尉馬希範爲湖南節度使檢校太尉兼侍中甲申
荆南節度使檢校太傅兼中書令高從誨加檢校太尉
兼中書令壬辰供奉官李瓌自西川迴節度使孟知祥
附表陳敘隔絕之由並進物先賜金器等瓌知祥甥也
母在蜀故令瓌往焉瓌至蜀具述朝廷厚待之意知祥
稱藩如初奏福慶長公主以今年正月十二日薨又奏
五月三日大破東川董璋之衆于漢州收下東川又表
立功將校趙季良等五人乞授節鉞部內刺史令錄已
下官乞許墨制補授帝遣閣門使劉政恩充西川宣諭
使乙巳契丹遣使自幽州進馬秦州地震冬十月己酉

朔再遣供奉官李瓌使西川押賜故福慶長公主祭贈絹三千匹並賜知祥玉帶先是兩川隔遠朝廷兵士不下三萬人至是知祥上表乞發遣兵士家屬入川詔報不允知祥所奏兩川部內文武將吏乞許權行墨制除補訖奏詔許之知祥所奏立功大將趙季良等五人正授節鉞續有處分襄州奏漢水溢壞民廬舍癸丑以太常卿劉岳卒廢朝己未以兵部侍郎張文寶爲吏部侍郎以戶部侍郎藥縱之爲兵部侍郎庚申幸至德宮因幸石敬瑭李從昶李從敏之第壬申大理少卿康澄上疏曰臣聞安危得失治亂興亡誠不繫于天時固非由

于地利童謠非禍福之本妖祥豈隆替之源故雉雉昇
鼎而桑穀生朝不能止殷宗之盛神馬長嘶而玉龜告
兆不能延晉祚之長是知國家有不足懼者五有深可
畏者六陰陽不調不足懼三辰失行不足懼小人訛言
不足懼山崩川涸不足懼蝨賊傷稼不足懼此不足懼
者五也賢人藏匿深可畏四民遷業深可畏上下相徇
深可畏廉恥道消深可畏毀譽亂真深可畏直言蔑聞
深可畏此深可畏者六也伏惟陛下尊臨萬國奄有八
紘蕩三季之澆風振百王之舊典設四科而羅俊彥提
二柄而御英雄所以不軌不物之徒咸思革面無禮無

義之輩相率懷心然而不足懼者願陛下存而勿論深
可畏者願陛下修而靡忒加以崇三綱五常之教敷六
府三事之歌則鴻基與五岳爭高盛業共磐石永固優
詔獎之澄言可畏六事實中當時之病識者許之癸酉
湖南馬希範荆南高重誨並進銀及茶乞賜戰馬帝還
其直各賜馬有差丁丑帝謂范延光曰如聞禁軍戍守
多不稟藩臣之命緩急如何驅使延光曰承前禁軍出
戍便令逐處守臣管轄斷決近似簡易帝曰速以宣命
條舉之十一月辛巳以三司使左武衛大將軍孟鵠爲
許州節度使以前許州節度使馮贇爲宣徽使判三司

以宣徽北院使孟漢瓊判院事壬午史館奏宣宗已下

四廟未有實錄請下兩浙荆湖購募野史及除日報狀

從之

五代會要載十一月四日史館奏當館昨爲大中以來迄于天祐四朝實錄尚未纂修尋具奏聞謹

行購募勅命雖頒于數月圖書未貢于一編蓋以北土

州城久罹兵火遂成滅絕難可訪求切恐歲月漸深耳目不接長爲闕典過在攸司伏念江表列藩湖南奧壤至于閩越方屬勳賢戈鋌自擾于中原屏翰悉全于外

府固多奇士富有羣書其兩浙福建湖廣伏乞詔旨委各于本道采訪宣宗懿宗僖宗昭宗以上四朝野史及

逐朝日歷銀臺事宜內外制詞百司沿革簿籍不限卷數據有者抄錄上進若民間收得或隱士撰成卽令各

列姓名請議爵賞

癸未以左僕射致仕鄭珏卒廢朝丁亥以河

陽節度使兼六軍都衛副使石敬瑭爲河東節度使兼

大同彰國振武威塞等軍蕃漢馬步總管時契丹帳族

在雲州境上與羣臣議擇威望大臣以制北方故有是
命己丑樞密使趙延壽加同平章事詔在京臣寮不得
進奉賀長至馬及諸物甲午日南至帝御文明殿受朝
賀己亥河中節度使李從璋加檢校太傅以右散騎常
侍楊凝式爲工部侍郎庚子以秘書監盧文紀爲工部
尚書以工部尚書崔居儉爲太常卿以工部侍郎鄭韜
光爲禮部侍郎乙巳雲州奏契丹主在黑榆林南納喇
泊造攻城之具帝遣使賜契丹主銀器綵帛十二月戊
申朔供奉官丁延徽倉官田繼勳並棄市坐擅出倉粟
數百斛故也教坊伶官敬新磨受賄爲人告帝令御史

臺徵還其錢而後撻之癸丑幸龍門觀修伊水石堰賜
丁夫酒食後數日有司奏丁夫役限十五日已滿工未
畢請更役五日帝曰不惟時寒且不可失信于小民卽
止其役甲寅以太子賓客歸藹卒廢朝戊午以前宣徽
使朱宏昭爲襄州節度使康義誠爲河陽節度使充侍
衛親軍馬步都指揮使壬戌以吏部侍郎姚顛爲尚書
左丞以尙書左丞王權爲禮部尚書以兵部侍郎藥縱
之爲吏部侍郎以翰林學士中書舍人程遜爲戶部侍
郎依前充職戊辰帝畋于近郊射中奔鹿是冬無雪

舊五代史卷四十三

舊五代史卷四十三攷證

唐明宗紀九遣邠州節度使藥彥稠 邠州歐陽史作

靜難軍

藥彥稠奏誅党項阿埋等十族與康福入白魚谷 白

魚谷歐陽史作牛兒谷

戊午荆南奏東川董璋領兵至漢州西川孟知祥出兵

逆戰璋大敗 案通鑑孟知祥克東川在五月五代

春秋歐陽史俱作六月蓋以薛史奏聞之日爲據

供奉官李瓌 李瓌通鑑作李存瓌唐人避莊宗諱故

去存字

秋七月辛巳朔以天下兵馬元帥尚父吳越王錢鏐薨
廢朝三日 案五代春秋七月吳王錢鏐薨蓋祇以
薛史廢朝之日爲據也通鑑作三月庚戌與九國志
異

丙戌詔賜諸軍救接錢有差 案救接錢疑有舛誤攷
冊府元龜亦作救接今仍其舊

癸亥以湖南節度使馬希聲卒廢朝 案通鑑馬希聲
卒在七月辛卯五代春秋從是書作八月

扎拉特哩袞舊作則刺惕隱今改 哲爾格錫里舊作
則骨舍利今改 納喇泊舊作捺刺泊今改

舊五代史卷四十三攷證

舊五代史卷四十四

宋門下侍郎參知政事監修國史薛居正等撰

唐書第二十

明宗紀十

長興四年春正月戊寅朔帝御明堂殿受朝賀仗衛如式是日雪盈尺戊子秦王從榮加守尚書令兼侍中依前河南尹判六軍諸衛事庚寅以端明殿學士尚書兵部侍郎劉昫爲中書侍郎平章事甲午正衙命使册故福慶長公主孟氏爲晉國雍順長公主遣太常卿崔居儉赴西川行册禮突厥內附庚子以前河東節度使李

從溫爲鄆州節度使二月癸丑朔帝于便殿問范延光
內外見管馬數對曰三萬五千匹帝歎曰太祖在太原
騎軍不過七千先皇自始至終馬纔及萬今有鐵馬如
是而不能使九州混一是吾養士練將之不至也吾老
矣馬將奈何延光奏曰臣每思之國家養馬太多試計

一騎士之費可贍步軍五人三萬五千騎抵十五萬步

軍旣無所施虛耗國力臣恐日久難繼帝曰誠如卿言

肥騎士而瘠吾民何益哉

五代會要上問見管馬數樞密使范延光奏天下常支草

粟者近五萬匹見今西北諸道蕃賣馬者往來如市其郵傳之費中估之直日以四十五貫以臣計之國力十耗其七馬無所使財賦漸消朝廷甚非所利上善之十月敕沿邊藩鎮或有蕃部賣馬可擇其良壯給券具數

以聞丁巳以虔州節度使檢校太尉兼侍中馬希振爲洪州節度使以鄂州節度使馬希廣爲檢校太尉同平章事充桂州節度使以廬州節度使兼武安軍副使姚彥章爲檢校太尉同平章事以靜江節度副使馬希範爲鄂州節度使故潞州節度使檢校太保康君立贈太傅已未宋州節度使安元信加兼侍中濮州進重修河堤圖沿河地名歷歷可數帝覽之愀然曰吾佐先朝定天下于此隄塢間大小數百戰又指一邱曰此吾擐甲臺也時事如昨奄忽一紀令人悲歎耳癸亥以西川節度使孟知祥爲劔南東西兩川節度使封蜀王三司奏當

省有諸道鹽鐵轉運使衙職員都押衙正押衙同押衙
通引衙前虞候子弟今欲列爲三司職名從之庚午以
御史中丞崔衍爲兵部侍郎以右諫議大夫龍敏爲御
史中丞三月己卯幸龍門延州節度使安從進奏夏州
節度使李仁福卒其子彝超自稱畱後甲申鎮州奏行
軍司馬趙瓌節度判官陸浣元從押衙高知柔等並棄
市坐受賂枉法殺人也節度使李從敏罰一季俸乙酉
以西川節度副使知武泰軍節度兵馬畱後趙季良爲
檢校太保黔南節度使以西川諸軍馬步都指揮使知
武信軍節度兵馬畱後李仁罕爲檢校太傅遂州節度

使以西川左廂馬步指揮使知保寧軍節度兵馬留後
趙廷隱爲檢校太保闕州節度使以西川右廂馬步都
指揮使知寧江軍兵馬留後張知業爲檢校司徒夔州
節度使以西川衙內馬步都指揮使知昭武軍兵馬留
後李肇爲檢校太保利州節度使從孟知祥之請也丙
戌賜宰相李愚絹百匹錢十萬鋪陳物一十三件時愚
病帝令近臣翟光鄴宣問所居寢室蕭然四壁病榻敝
瑣而已光鄴具言其事故有是賜戊子以延州節度使
安從進爲夏州留後以夏州左都押衙四州防遏使李
彝超爲延州留後仍命邠州節度使藥彥稠宮苑使安

重益帥師援送從進赴鎮以左衛上將軍盧文進爲潞州節度使以右龍武統軍張溫爲雲州節度使庚寅以鳳翔行軍司馬李彥琮爲鹽州防禦使時范延光等奏請因夏州之師制置鹽州故有是命癸巳以右威衛上將軍安重霸爲同州節度使己亥以左龍武統軍符彥超爲安州節度使詔除放京兆秦岐邠涇延慶同華興元十州長興元年二年係欠夏秋稅物及營田莊宅務課利以其曾輦運供軍糧料也甲辰故晉國夫人夏氏追册皇后有司上諡曰昭懿從之夏四月戊申李彝超奏奉詔除延州畱後已受恩命訖三軍百姓擁隔未遂

赴任帝遣閣門使蘇繼顏齎詔促彝超赴任癸丑以刑

部侍郎劉贊爲秘書監秦王傅

五代會要長興四年四月以秘書監劉贊爲秦

王傅前忠武軍節度判官蘇瓚爲秦王友前襄州觀察使魚崇遠爲秦王府記室參軍時言事者請爲秦王置

師傅上顧問近臣皆以秦王名勢隆盛不敢置議請自選擇乃降是命

甲寅前鄧州節度

使梁漢顓以太子少師致仕太子賓客裴暉以兵部尚

書致仕戊午追冊昭宗皇后何氏爲宣穆皇后祔饗太

廟百寮進名奉慰廢朝三日己巳以左散騎常侍任贊

爲戶部侍郎以吏部侍郎藥縱之爲曹州刺史癸酉延

州奏蕃部劫掠餉運及攻城之具守蘆關兵士退守金

明鎮五月丙子朔帝御文明殿受朝戊寅皇子鳳翔節

度使從珂封潞王新授戶部侍郎任贊改刑部侍郎贊
訴以所授官是丁憂闕故改焉皇子從益封許王鄆州
節度使李從溫封兗王河中節度使李從璋封洋王鎮
州節度使李從敏封涇王甲申帝避暑于九曲池既而

登樓風毒暴作聖體不豫翼日而愈

北夢瑣言上聖體乖和馮道對寢膳

之問動思調衛因指御前果實曰如食桃不康翼日見李而思戒可也初上因御李暴得風虛之疾馮道不敢斥言因奏事 丙戌契丹遣使朝貢丁酉安從進奏大軍

諷悟上意

已至夏州攻城以其不受命也庚子以靈武畱後張希
崇爲本州節度使辛丑故夏州節度使朔方郡王李仁
福追封號王壬寅以前晉州畱後薄文爲本州節度使

六月丙午朔文武百寮宰臣馮道等拜章請于尊號內
加廣運法天四字凡拜三章詔允之詔宮西新園宜名
永芳園其間新殿宜名和慶殿丙辰秦王從榮加食邑
至萬戶實封二千戶丁巳以右驍衛上將軍李從昶爲
左龍武統軍以前邢州節度使高允韜爲右龍武統軍
以右驍衛上將軍羅周敬爲左羽林統軍以右監門上
將軍婁繼英爲金州刺史戊午宋王從厚加食邑至萬
戶實封一千戶壬戌以前涇州節度使李金全爲滄州
節度使癸亥詔御史中丞龍敏等詳定大中統類甲子
第十四女封壽安公主第十五女封永樂公主戊辰以

前利州節度使孫漢韶爲洋州節度使壬申永寧軍節度使容州管內觀察使檢校太尉兼侍中馬存加食邑實封甲戌帝復不豫秋七月丁丑以著作佐郎尹拙爲左拾遺直史館國朝舊制皆以畿赤尉直史館今用諫官自拙始從監修李愚奏也已卯東岳三郎神贈威雄大將軍初帝不豫前淄州刺史劉遂清薦泰山僧一人云善醫及召見乃庸僧耳問方藥僧曰不工醫嘗于泰山中親覩嶽神謂僧曰吾第三子威靈可愛而未有爵秩師爲我請之宮中神其事故有是命識者嫉遂清之妖佞焉詔應臺官出行須令人訶引使軍巡職掌等規

避壬午詔安從進班師時王師攻夏州無功故也乙酉以許州節度使孟鵠卒廢朝贈太傅詔賜在京諸軍將校優給有差時帝疾未痊軍士有流言故也丁亥兩浙節度使檢校太傅守中書令錢元瓘封吳王八月戊申帝被袞冕御明堂殿受冊徽號曰聖明神武廣運法天文德恭孝皇帝禮畢制大赦天下常赦所不原者咸赦除之己酉賜侍衛諸軍優給有差時月內再有頒給自茲府藏無餘積矣辛亥以晉州節度使薄文卒廢朝丁巳以右龍武統軍李從昶爲許州節度使戊午以祕書監高輅卒廢朝辛酉以太子太師致仕符習卒廢朝贈

太師辛未秦王從榮以本官充天下兵馬大元帥加食
邑萬戶實封三千戶以右羽林統軍翟璋爲晉州節度
使以太子賓客馬鎬爲戶部侍郎壬申幸至德宮九月
甲戌以戶部尚書李璘爲兵部尚書以前戶部尚書韓
彥憚爲戶部尚書丙子幸至德宮戊寅樞密使范延光
趙延壽並加兼侍中依前充使中書奏元帥儀注諸道
節度使以下帶兵權者階下具軍禮參見其帶使相者
初見亦展一度公禮天下軍務公事元帥府行帖指揮
其判六軍諸衛事則公牒往來其官屬軍職委元帥府
奏請從之癸未以兵部侍郎盧詹爲吏部侍郎丙戌宰

臣馮道加左僕射李愚加吏部尚書劉昫加刑部尚書
戊子河陽節度使兼侍衛親軍都指揮使康義誠山南
西道節度使檢校太傅張虔釗並加同平章事宣徽南
院使判三司馮贇依前檢校太傅同平章事中書門下
同二品充三司使贇亡父名章故改平章事爲同二品
壬戌永寧公主石氏進封魏國公主興平公主趙氏進
封齊國公主皇孫重光重哲並授銀青光祿大夫檢校
工部尚書秦王宋王子也前洋州節度使梁漢顓以太
子少傅致仕丁酉以右龍武統軍高允韜爲滑州節度
使以韶州刺史檢校司空王萬榮爲華州節度使萬榮

王妃之父也戊戌以樞密使趙延壽爲汴州節度使以襄州節度使朱宏昭爲檢校太尉同平章事充樞密使時范延光趙延壽相繼辭退樞密務及朱宏昭有樞密之命又面辭訴帝叱之曰爾輩皆欲離朕左右怕在眼前素養爾輩將何用也宏昭退謝不復敢言吏部侍郎張文寶卒庚子清海軍節度使錢元壽加檢校太傅同平章事中吳建武等軍節度使錢元璪加檢校太師兼中書令以前滑州節度使李贄華遙領虔州節度使辛丑詔天下兵馬大元帥秦王從榮班宜在宰臣之上

五代

會要秦王從榮加兼中書令與宰臣分班左右定位及爲天下兵馬元帥勅曰秦王位隆將相望重磐維委任

既崇等威合異班
位宜在宰臣之上

壬寅以北面行營都指揮使易州刺

史楊檀爲振武軍節度使冬十月丙午以前同州節度
使趙在禮爲襄州節度使丁未以前滑州節度使張敬
詢卒廢朝以刑部侍郎任贊爲兵部侍郎充元帥府判
官戊午以前鳳翔節度使孫岳爲三司使庚申以樞密
使范延光爲鎮州節度使以三司使馮贇爲樞密使辛
酉以前潞州節度使李承約爲左龍武統軍以前威塞
軍節度使王景戩爲右龍武統軍以左驍衛上將軍安
崇阮爲左神武統軍以右監門上將軍高允貞爲右神
武統軍壬戌以權知夏州事檢校司空李彝超爲夏州

節度使檢校司徒丙寅詔在朝文武臣寮並與加恩以受冊尊號也戊辰以前安州節度使楊漢章爲兗州節度使以前雲州節度使張敬達爲徐州節度使庚午以前兗州節度使張延朗爲秦州節度使壬申秦州節度使劉仲殷移鎮宋州十一月丙子以前滄州節度使盧質爲右僕射庚辰改慎州懷化軍爲昭化軍升洮州爲保順軍辛巳以保大軍節度使檢校太尉鮑君福爲保順軍節度洮鄯等州觀察等使以彰義軍節度使檢校太尉同平章事杜建徽爲昭化軍節度慎瑞司等州觀察使乙酉以前汴州節度使李從曠爲鄆州節度使以

鄆州節度使李從溫爲定州節度使丙戌新授右僕射
盧質奏臣忝除官合赴省上事若準舊例左右僕射上
事儀注所費極多欲從權務簡只取尚書丞郎上事例
止集南省屬寮及兩省官送上亦不敢輒援往例有費
官用自量力排比兼不敢自臣隳廢前規他時任行舊
制從之戊子帝不豫己丑大漸自廣壽殿移居雍和殿
是夜四鼓後帝自御榻蹶然而興顧謂知漏宮女曰夜
漏幾何對曰四更因奏曰官家省事否帝曰省因唾出
肉片如肺者數片便溺升餘六宮皆至慶躍而奏曰官
家今日實還魂也因進粥一器侍醫進湯膳至暝帝小

康壬辰天下大元帥守尚書令兼侍中秦王從榮領兵陣于天津橋內出禁軍拒之從榮敗奔河南府遇害帝聞之悲駭幾落御榻氣絕而蘇者再繇是不豫有加癸巳馮道率百寮見帝于雍和殿帝雨泣哽噎曰吾家事若此慙見卿等百寮皆泣下霑襟甲午賜宰臣樞密使御衣玉帶康義誠已下錦帛鞍馬有差遣宣徽使孟漢瓊召宋王于鄴都乙未以三司使孫岳爲亂兵所害廢朝丁酉勅秦王府官屬除諮議參軍高輦已處斬外元帥府判官兵部侍郎任贊配武州祕書監兼秦王傅劉贊配嵐州河南少尹劉陟配均州並爲長流百姓縱逢

恩赦不在放還河南少尹李蕤配石州河南府判官司
徒詔配寧州秦王友蘇瓚配萊州記室參軍魚崇遠配
慶州河南府推官王說配隨州並爲長流百姓河南府
推官尹謹六軍巡官董裔張九思河南府巡官張沆李
潮江文蔚並勒歸田里應長流人並除名六軍判官殿
中監王居敏責授復州司馬六軍推官郭駿責授坊州
司戶並員外置所在馳驛發遣時宰相樞密使共議任
贊等已下罪馮道等曰任贊前在班行比與從榮無舊
除官未及月餘便逢此禍王居敏司徒詔疾病請假將
近半年近日之事計不同謀從榮所欵昵者高輦劉陟

王說三人昨從榮稱兵指闕之際沿路只與劉陟高輦並轡耳語至天津橋南指日影謂諸判官曰明日如今已誅王居敏矣則知其冗泛之徒不可一例從坐朱宏昭意欲盡誅任贊已下馮贊力爭之乃已戊戌帝崩于大內之雍和殿壽六十七二月癸卯朔遷梓宮于二儀殿宋王從厚自鄴都至是日發哀百寮縞素于位中書侍郎平章事劉昫宣遺制宋王從厚于柩前卽皇帝位服紀以日易月一如舊制云明年四月太常卿盧文紀上諡議曰聖智仁德欽孝皇帝廟號明宗宰臣馮道議請改聖智仁德四字爲聖德和武欽孝皇帝宰臣劉

昉撰謚册文宰臣李愚撰哀册文是月二十七日葬于

徽陵

五代史補明宗之在位也一旦幸倉場觀納時主者以車駕親臨懼得其罪較量甚輕明宗因謂之

曰且朕自省事以來倉場給散動經一二十年未畢今輕量如此其後銷折將何以償之對曰竭盡家產不足

則繼之以身命明宗愴然曰只聞百姓養一家未聞一家養百姓今後每石加二斗耗以備鼠雀侵蠹謂之鼠

雀耗倉糧起自此也五代史闕文明宗出自邊地老于戰陳卽位之歲年已六旬純厚仁慈本乎天性每夕

宮中焚香仰天禱祝云某蕃人也遇亂世爲衆推戴事不獲已願上天早生聖人與百姓爲主故天成長興間

比歲豐登中原無事言于五代粗爲小康

史臣曰明宗戰伐之勳雖高佐命潛躍之事本不經心會王室之多艱屬神器之自至諒由天贊匪出人謀及應運以君臨能力行乎王化政皆中道時亦小康近代

已來亦可宗也儻使重誨得房杜之術從榮有啟誦之
賢則宗祧未至于危亡載祀或期于綿遠矣惜乎君親
可輔臣子非才遽泯烝嘗良可深歎矣

舊五代史卷四十四攷證

唐明宗紀十以端明殿學士尚書兵部侍郎劉昫爲中書侍郎平章事 案歐陽史劉昫傳作長興三年拜中書侍郎兼刑部尚書同中書門下平章事與本紀繫年先後互異見吳縝纂誤

二月癸丑朔 案上文正月爲戊寅朔則二月不得爲癸丑朔原文疑有舛誤

帝于便殿問范延光內外見管馬數 案錦繡萬花谷引薛史作范延慶疑傳寫之訛

以刑部侍郎劉贊爲秘書監 刑部侍郎通鑑作兵部

侍郎歐陽史從是書

以著作佐郎尹拙爲左拾遺直史館 案五代會要尹拙爲左拾遺王慎徽爲右拾遺並直史館是書闕載

王慎徽

戊子帝不豫 案歐陽史本紀十月壬申幸上和亭得疾家人傳十一月戊子雪明宗幸宮西上和亭得傷寒疾紀傳互異見吳縝纂誤

壬辰天下大元帥守尚書令兼侍中秦王從榮領兵陣于天津橋內出禁軍拒之從榮敗奔河南府遇害

案五代春秋作壬午誅從榮蓋傳寫之訛歐陽史及

通鑑並從是書作壬辰

舊五代史卷四十四攷證

舊五代史卷四十五

未門下侍郎參知政事監修國史薛居正等撰

唐書第二十一

閔帝紀

閔帝諱從厚小字菩薩奴明宗第三子也母昭懿皇后

夏氏以天祐十一年歲在甲戌十一月二十八日庚申

生帝于晉陽舊第帝髫鬣好讀春秋畧通大義貌類明

宗尤鍾愛天成元年授金紫光祿大夫檢校司徒二年

四月加檢校太保同平章事河南尹判六軍諸衛事十

一月加檢校太傅三年三月授汴州節度使四年移鎮

河東長興元年改授鎮州節度使尋封宋王二年加檢校太尉兼侍中移鎮鄴都三年加中書令秦王從榮帝同母兄也以帝有德望深所猜忌帝在鄴宮恒憂其禍然善于承順竟免間隙四年十一月二十日秦王誅翼日明宗遣宣徽使孟漢瓊馳驛召帝二十六日明宗崩二十九日帝至自鄴十二月癸卯朔發喪于西宮帝于柩前卽位丁未羣臣上表請聽政表再上詔允己酉中外將士給賜有差庚戌帝褫服見羣臣于廣壽門之東廡下宰臣馮道進曰陛下久居哀毀臣等咸願一覩聖顏朱宏昭前舉帽羣臣再拜而退御光政樓存問軍民

辛亥賜司衣王氏死坐秦王事也癸丑以前鎮州節度使涇王從敏權知河南府事尋以盧質代之乙卯賜司儀康氏死事連王氏也丙辰以天雄軍節度判官唐訥爲諫議大夫掌書記趙彖爲起居郎元從都押衙宋令詢爲磁州刺史丁巳以左僕射平章事馮道爲山陵使戶部尚書韓彥暉爲副中書舍人王延爲判官禮部尚書王權爲禮儀使兵部尚書李鱗爲鹵簿使御史中丞龍敏爲儀仗使右僕射權知河南府盧質爲橋道頓遞使庚申以前相州刺史郝瓊爲右驍衛大將軍充宣徽北院使以光祿卿充三司副使王政爲三司使癸亥故

檢校太尉右衛上將軍充三司使孫岳贈太尉齊國公
丁卯帝釋縵服羣臣三上表請復常膳御正殿從之辛
未帝御中興殿羣臣列位馮道升階進酒帝曰比于此
物無愛除賓友之會不近樽俎況在沉痛之中安事飲
啖命徹之

應順元年春正月壬申朔帝御廣壽殿視朝百寮詣閣
門奉慰時議者云月首以常服臨不視朝可也乙亥契
丹遣使朝貢

遼史太宗紀天顯九年閏月戊午唐遣使來告哀卽日遣使祭弔

丁丑以

太常卿崔居儉爲秘書監以前蔡州刺史張繼祚爲左
武衛上將軍充山陵橋道頓遞副使戊寅御明堂殿仗

衛如儀宮懸樂作羣臣朝服就位宣制大赦天下改長
興五年爲應順元年時議者以梓宮在殯宮懸樂作非
禮也懸而不作可也回鶻可汗仁美遣使貢方物故可
汗仁裕進遺留馬是日命中使三十五人以先帝鞍馬
衣帶分賜藩位庚辰宰臣馮道加司空李愚加右僕射
劉昫加吏部尚書餘竝如故壬午侍衛親軍馬步軍都
指揮使河陽節度使康義誠加檢校太尉兼侍中判六
軍諸衛事甲申以侍衛馬軍都指揮使寧國軍節度使
安彥威爲河中節度使以侍衛步軍都指揮使忠正軍
節度使張從賓爲涇州節度使並加檢校太傅以捧聖

左右廂都指揮使欽州刺史朱洪實爲寧國軍節度使
加檢校太保充侍衛馬軍都指揮使以嚴衛左右廂都
指揮使巖州刺史皇甫遇爲中正軍節度使檢校太保
充侍衛步軍都指揮使戊子樞密使檢校太尉同平章
事朱宏昭樞密使檢校太尉同中書門下二品馮贇並
加兼中書令北京畱守河東節度使兼大同彰國振武
威塞等軍蕃漢馬步總管石敬瑭加兼中書令幽州節
度使檢校太尉兼中書令趙德鈞加檢校太師兼中書
令樞密使馮贇表堅讓中書令制改兼侍中封邠國公
庚寅鳳翔節度使潞王從珂加兼侍中青州節度使檢

校太尉兼中書令房知溫加檢校太師辛卯以翰林學士承旨尚書右丞李懌爲工部尚書以秘書監盧文紀爲太常卿充山陵禮儀使壬辰荆南節度使檢校太尉兼中書令高從誨封南平王湖南節度使檢校太尉兼中書令馬希範封楚王甲午兩浙節度使檢校太師守中書令吳王錢元瓘進封吳越王前洺州團練使皇甫立加檢校太保充鄆州節度使前彰義軍節度使康福加檢校太傅充邠州節度使劔南東西兩川節度使檢校太尉兼中書令蜀王孟知祥加檢校太師制下知祥辭不受命丙申鎮州節度使檢校太尉兼侍中范延光

汴州節度使檢校太尉兼侍中趙延壽並加檢校太師
戊戌山南西道節度使檢校太傅同平章事張虔釗襄
州節度使趙在禮並加檢校太尉辛丑以振武軍節度
使安北都護楊檀兼大同彰國振武威塞等軍都虞候
充北面馬軍都指揮使閏月壬寅朔羣臣赴西宮臨癸
卯御文明殿入閣以前右僕射權知河南府事盧質爲
太子少傅兼河南尹以諫議大夫唐洎膳部郎中知制
誥陳又並爲給事中充樞密院直學士通鑑洎以文學
從帝歷三鎮在
幕府及卽位將佐之有才者朱馮皆斥逐之洎性迂疎
朱馮恐帝含怒有時而發乃引洎于密近以其黨陳又
監之宣徽南院使驃騎大將軍左衛上將軍知內侍省孟

漢瓊加開府儀同三司賜忠貞扶運保泰功臣丙午正
衙命使册皇太后曹氏戊申以前雄武軍節度使劉仲
殷爲右衛上將軍邢州節度使趙鳳加爵邑自是諸藩
鎮文武臣寮皆次第加恩帝嗣位覃恩澤也以翰林學
士中書舍人崔悅爲工部侍郎依前充職以給事中張
鵬爲御史中丞以御史中丞龍敏爲兵部侍郎以太僕
少卿竇維爲大理卿甲寅正衙命使册皇太妃王氏集
賢院上言準敕書修創凌烟閣尋奉詔問閣高下等級
謹按凌烟閣都長安時在西內三清殿側畫像皆北面
閣有中隔隔內面北寫功高宰輔南面寫功高諸侯王

隔外面次第圖畫功臣題贊自西京板蕩四十餘年舊
日主掌官吏及畫像工人並已淪喪集賢院所管寫真
官畫真官人數不少都洛後廢職今將起閣望先定佐
命功臣人數請下翰林院預令寫真本及下將作監興
功次序間架修建乃詔集賢御書院復置寫真官畫真
官各一員餘依所奏丁巳安州奏此月七日夜節度使
符彥超爲部曲王希全所害廢朝一日戊午以前振武
軍節度使安北都護高行周爲彰武節度辛酉以前鄆
州闕使范政爲少府監丙寅幸至德宮車駕至興教門
有飛鳶自空而墜彊于御前是日大風晦冥二月乙亥

以前鎮州節度使涇王從敏爲宋州節度使已卯以前
徐州節度使檢校太傅李敬周爲安州節度使是日宣
授鳳翔節度使潞王從珂爲權北京畱守以北京畱守
石敬瑭權知鎮州軍州事以鎮州范延光權知鄴都畱
守事以前河中節度使洋王從瑋權知鳳翔軍軍府事
庚寅幸山陵工作所是日西京畱守王思同奏鳳翔節
度使潞王從珂拒命丁酉王思同加同平章事充西面
行營都部署以前邠州節度使藥彥稠爲副部署以河
中節度使安彥威爲西面兵馬都監以前定州節度使
李德珣爲權北京畱守山陵使奏伏覲御札皇帝親奉

靈駕至園陵伏見累朝故事人君無親送葬之儀請車
駕不行不從乙未樞密使馮贇起復視事時贇丁母憂
也已亥以司農卿張鎔爲殿中監庚子殿直楚匡祚上
言監取亳州團練使李重吉至宋州繫于軍院重吉潞
王之長子及幽于宋州帝猶以金帛賜之及聞西師咸
叛方遣使殺之三月甲辰以前太僕少卿魏仁錡爲太
僕卿興元節度使張虔釗奏會合討鳳翔丙午以右領
衛上將軍武延翰爲郢州刺史丁未洋州孫漢韶奏至
興元與張虔釗同議進軍己酉以鎮州節度使范延光
依前檢校太師兼侍中行興唐尹充天雄軍節度使北

面水陸轉運制置使以北京留守河東節度使石敬瑭
依前檢校太尉兼中書令其真定尹充鎮州節度使大
同彰國振武威塞等軍蕃漢馬步總管如故辛亥以前
定州節度使李德珣爲北京留守充河東節度使許王
從益加檢校太保前河中節度使洋王從璋加檢校太
傅詔藩侯帶平章事以上薨許立神道碑差官撰文未
帶平章事及刺史準令式合立碑者其文任自製撰不
在奏聞乙卯興元張虔釗奏自鎮將兵赴鳳翔收大散
關宗正寺奏準故事諸陵有令丞各一員近例更委本
縣令兼之緣河南洛陽是京邑兼令丞不便詔特置陵

臺令丞各一員已未以前金吾大將軍李肅爲左衛上將軍充山陵修奉上下宮都部署庚申西面步軍都監王景從等自軍前至奏本月十五日大軍進攻鳳翔十六日嚴衛右廂都指揮使尹暉引軍東面入城右羽林都指揮使楊思權引軍西面入城山南軍潰帝聞之謂康義誠等曰朕幼年嗣位委政大臣兄弟之間必無榛梗諸公大計見告朕獨難違事至于此何方轉禍朕當與左右自往鳳翔迎兄主社稷朕自歸藩于理爲便朱宏昭馮贇不對義誠曰西師驚潰蓋由主將失策今駕下兵甲尚多臣請自往關西振其兵威扼其衝要義誠

又累奏請行帝召侍衛都將以下宣曰先皇帝棄萬國
朕于兄弟之中無心爭立一旦被召主喪便委社稷岐
陽兄長果致猜嫌卿等頃從先朝千征萬戰今日之事
寧不痛心今據府庫悉以頒賜卿等勉之乃出銀絹錢
厚賜于諸軍是時方事山陵復有此賜府藏爲之一空
軍士猶負賞物揚言于路曰到鳳翔更請一分其驕誕
無畏如是辛酉幸左藏庫視給將士金帛是日誅馬軍
都指揮使朱洪實坐與康義誠忿爭故也癸亥以康義
誠爲鳳翔行營都招討使餘如故以王思同爲副招討
使以安從進爲順化軍節度使充侍衛馬軍都指揮使

詔左右羽林軍四十指揮改爲嚴衛左右龍武神武軍
改爲捧聖甲子陝州奏潞王至潼關害西面都部署王
思同乙亥宣諭西面行營將士俟平鳳翔日人賞二百
千府庫不足以宮闈服翫增給詔侍衛馬軍都指揮使
安從進京城巡檢是日從進已得潞王書檄潛布腹心
矣丁卯潞王至陝州戊辰帝急召孟漢瓊不至召朱宏
昭宏昭懼投于井安從進尋殺馮贇于其第是夜帝以
百騎出元武門謂控鶴指揮使慕容遷曰爾誠有馬控
鶴從子及駕出卽闔門不行遷乃帝素親信者也臨危
如是人皆惡之是月二十九日夜帝至衛州東七八里

遇騎從自東來不避左右叱之乃曰鎮州節度使石敬瑭也帝喜敬瑭拜舞于路帝下馬慟哭諭以潞王危社稷康義誠以下叛我無以自庇長公主見教逆爾于路謀社稷大計敬瑭曰衛州王宏贄宿舊諳事且就宏贄圖之敬瑭卽馳騎而前見宏贄曰主上播遷至此危迫吾戚屬也何以圖全宏贄曰天子避狄古亦有之然于奔迫之中亦有將相國寶法物所以軍長瞻奉不覺其亡也今宰職近臣從乎寶玉法物從乎詢之無有宏贄曰大樹將顛非一繩所維今以五十騎奔竄無將相一人擁從安能興復大計所謂蛟龍失雲雨者也今六軍

將士總在潞邸矣公縱以戚藩念舊無奈之何遂與宏
贄同謁于驛亭宣坐謀之敬瑭以宏贄所陳以聞弓箭
庫使沙守榮奔洪進前謂敬瑭曰主上卽明宗愛子公
卽明宗愛壻富貴旣同受休戚合共之今謀于戚藩欲
期安復翻索從臣國寶欲以此爲辭爲賊算天子耶乃
抽佩刀刺敬瑭敬瑭親將陳暉扞之守榮與暉單戰而
死洪進亦自刎是日敬瑭盡誅帝之從騎五十餘輩獨
留帝于驛乃馳騎趨洛四月三日潞王入洛五日卽位
七日廢帝爲鄂王遣宏贄子殿直王巒之衛州時宏贄
已奉帝幸州解九日巒至帝遇鳩而崩時年二十一

日辰時白虹貫日皇后孔氏在宮中及王薨迴卽日與其四子並遇害晉高祖卽位諡曰閔與秦王及末帝子重吉竝葬于徽陵域中封纜數尺路人觀者悲之

史臣曰閔帝爰自沖年素有令問及徵從代邸入踐堯階屬軒皇之弓劍初遺吳王之几杖未賜遽生猜間遂至奔亡蓋輔臣無安國之謀非少主有不君之咎以至越在草莽失守京祧斯蓋天命之難忱土德之將謝故也

舊五代史卷四十五

舊五代史卷四十五攷證

唐閔帝紀閔帝諱從厚小字菩薩奴明宗第三子也

案歐陽史作明宗第五子吳縝嘗辨其誤今攷五代會要亦作第三子與是書同

十二月癸卯朔 案五代春秋作癸亥朔蓋傳寫之訛
歐陽史通鑑俱從是書作癸卯

節度使符彥超爲部曲王希全所害 案彥超被害通鑑從是書作閏月五代春秋繫于正月殊誤

丁酉王思同加同平章事充西面行營都部署以前邠州節度使藥彥稠爲副部署 案歐陽史辛卯西京

留守王思同爲西面行營都部署靜難軍節度使藥
彥稠爲副是書作丁酉與歐陽史異據通鑑則思同
以辛卯充都部署丁酉加同平章也蓋采薛歐二史
而兼用之

殿直楚匡祚上言 楚匡祚原本作楚祚今從通鑑增
匡字

陝州奏潞王至潼關害西面都部署王思同 歐陽史
作思同奔歸于京師死之與是書異

是夜帝以百騎出元武門 案契丹國志愍帝領五十
騎自隨出奔衛州宋史李洪信傳又作少帝東奔捧

聖軍數百騎從行與是書異據下文王宏贊曰今以五十餘騎奔竄則作五十騎者是也

九日巒至帝遇鳩而崩 案契丹國志云王巒至衛州進鳩于愍帝愍帝不飲巒縊殺之與是書異

舊五代史卷四十五攷證

舊五代史卷四十六

宋門下侍郎參知政事監修國史薛居正等撰

唐書第二十二

末帝紀上

末帝諱從珂本姓王氏鎮州人也母宣憲皇后魏氏以光啟元年歲在己巳正月二十三日生帝于平山景福中明宗爲武皇騎將略地至平山遇魏氏據之帝時年十餘歲明宗養爲己子小字二十三帝幼謹重寡言及壯長七尺餘方頤大體材貌雄偉以驍果稱明宗甚愛之在太原嘗與石敬瑭因擊毬同入于趙襄子之廟見

其塑像屹然起立帝秘之私心自負及從明宗征討以力戰知名莊宗嘗曰阿三不惟與我同齒敢戰亦相類莊宗與梁軍戰于胡柳陂兩軍俱撓帝衛莊宗奪土山摧驍陣其軍復振時明宗先渡河莊宗不悅謂明宗曰公當爲我死渡河安往明宗待罪莊宗以帝從戰有功由是解慍天祐十八年莊宗營于河上議討鎮州畱守符存審在德勝若未行梁人謂莊宗已北乃悉衆攻德勝莊宗命明宗存審爲兩翼以抗之自以中軍前進梁軍退卻帝以十數騎雜梁軍而退至壘門大呼斬首數級斧其望櫓而還莊宗大噓曰壯哉阿三賜酒一器同

光元年四月從明宗襲破鄆州九月莊宗敗梁將王彥章于中都急趨汴州明宗將前軍帝率勁騎以從晝夜兼行率先下汴城莊宗勞明宗曰復唐社稷卿父子之功也二年以帝爲衛州刺史時有王安節者昭宗朝相杜讓能之宅吏也安節少善賈得相術于奇士因事見帝于私邸退謂人曰真北方天王相也位當爲天子終則我莫知也三年明宗奉詔北禦契丹以家在太原表帝爲北京內衙指揮使莊宗不悅以帝爲突騎都指揮使遣戍石門四年魏州軍亂明宗赴洛時帝在橫水率部下軍士由曲陽孟縣趨常山與王建立會倍道兼行

渡河而南由是明宗軍聲大振天成初以帝爲河中節度使明年二月加檢校太保同平章事十一月加檢校太傅長興元年加檢校太尉先是帝與樞密使安重誨在常山因杯盤失意帝以拳擊重誨腦中其櫛走而獲免帝雖悔謝然重誨終銜之及帝鎮河中重誨知其出入不時因矯宣中旨令牙將楊彥溫遇出郭則閉門勿納是歲四月五日帝閱馬于黃龍莊彥溫閉城拒帝帝聞難遽還遣問其故彥溫曰但請相公入朝此城不可入也帝止虞鄉以聞明宗詔帝歸闕遣藥彥稠將兵討彥溫令生致之面要鞫問十一月收城彥溫已死明宗

以彥稠不能生致彥溫甚怒之後數日安重誨以帝失
守諷宰相論奏行法明宗不悅重誨又自論奏明宗曰
朕爲小將校時家徒衣食不足賴此兒荷石灰收馬糞
存養以至今貴爲天子而不能庇一兒卿欲行朝典朕
未曉其意卿等可速退從他私第閒坐遂詔歸清化里
第不預朝請帝尚懼重誨多方危陷但日諷佛書陰禱
而已二年安重誨得罪帝卽授左衛大將軍未幾復檢
校太傅同平章事行京兆尹充西京畱守三年進位太
尉移鳳翔節度使四年五月封潞王閔帝卽位加兼侍
中旣而帝子重吉出刺亳州女尼入宮帝方憂不測應

順元年二月移帝鎮太原是時不降制書唯以宣授而已帝聞之召賓佐將吏以謀之皆曰主上年幼未親庶事軍國大政悉委朱宏昭等王必無保全之理判官馬裔孫曰君命召不俟駕行焉諸君凶言非令圖也是夜

帝令李專美草檄求援諸道欲誅君側之罪朝廷命王

思同率師來討三月十五日外兵大集

九國志李彥琦傳潞王守岐下

諸道將急攻其壘彥琦時在圍中罄家財以給軍用

十六日大將督衆攻城帝登

城垂泣諭于外曰我年未二十從先帝征伐出生入死金瘡滿身樹立得社稷軍士從我登陣者多矣今朝廷信任賊臣殘害骨肉且我有何罪因慟哭聞者哀之時

羽林都指揮使楊思權謂衆曰大相公吾主也遂引軍自西門入嚴衛都指揮使尹暉亦引軍自東門而入外軍悉潰十七日率居民家財以賞軍士是日帝整衆而東二十日次長安副留守劉遂雍以城降率京兆居民家財犒軍二十三日次靈口誅王思同二十四日次華州收葉彥稠繫獄二十五日次闕鄉王仲臯父子迎謁帝誅之二十六日次靈寶河中節度使安彥威來降待罪宥之遣歸鎮陝州節度使康思立奉迎二十七日次陝州下令告諭京誠二十八日康義誠軍前兵士相繼來降義誠詣軍門請罪帝宥之駕下諸軍畢至誅宣徽

南院使孟漢瓊于路左是夜閔帝與帳下親騎百餘出元武門而去夏四月壬申帝至蔣橋文武百官立班奉迎教旨以未拜梓宮未可相見俟會于至德宮時六軍勦臣及節將內職已累表勸進是日帝入謁太后太妃至西宮伏梓宮慟哭宰相與百寮班見致拜帝答拜馮道等上牋勸進帝立謂羣臣曰予之此行事非獲已當俟主上歸闕園陵禮終退守藩服諸公言遽及此信無謂也衛州刺史王宏贊奏閔帝以前月二十九日至州癸酉皇太后下令降閔帝爲鄂王又太后令曰先皇帝誕膺天睭光紹帝圖明誠動于三靈德澤被于四海方

期偃革遠歎遺弓自少主之承祧爲奸臣之擅命離間
骨肉猜忌磐維旣輒易于藩垣復驟興于兵甲遂致輕
離社稷大撓軍民萬世鴻基將墜于地皇長子潞王從
珂位居冢嗣德茂冲年乃武乃文惟忠惟孝前朝廓清
多難有戰伐之大功續紹丕圖有夾輔之盛業今以宗
祧乏祀園寢有期須委親賢俾居監撫免萬機之壅滯
慰兆庶之推崇可起今日知軍國事權以書詔印
施行是日監國在至德宮宰臣馮道等率百官班于宮
門待罪帝出于庭曰相公諸人何罪請復位乃退甲戌
太后令曰先皇帝櫛風沐雨平定華夷嗣洪業于艱難

致蒼生于富庶鄂王嗣位奸臣弄權作福作威不誠不
信離間骨肉猜忌磐維鄂王輕捨宗祧不克負荷洪基
大寶危若綴旒須立長君以紹丕構皇長子潞王從珂
日躋孝敬天縱聰明有神武之英姿有寬仁之偉略先
朝經綸草昧廓靜寰區辛勤有百戰之勞忠貞贊一統
之運臣誠子道冠古超今而又克已化民推心撫士率
土之謳歌有屬上蒼之睠命攸臨一日萬幾不可以暫
曠九州四海不可以無歸况因山有期同軌斯至永言
嗣守屬任元良宜卽皇帝位乙亥監國赴西宮柩前告
奠卽位攝中書令李愚宣冊書曰維應順元年歲次甲

午四月庚午朔六日乙亥文武百寮特進守司空兼門
下侍郎同中書門下平章事充太微宮使宏文館大學
士上國柱始平郡公食邑二千五百戶臣馮道等九千
五百九十三人上言帝王興運天地同符河出圖而洛
出書雲從龍而風從虎莫不恢張八表覆育兆民立大
定之基保無疆之祚人謠再洽天命顯歸須登宸極之
尊以奉祖宗之祀伏惟皇帝陛下天資仁智神助機權
奉莊宗于多難之時從先帝于四征之際凡當決勝無
不成功洎正皇綱每嚴師律爲國家之志大守臣子之
道全自泣遺弓常悲易月欲期同軌親赴因山而自鄂

王承祧奸臣擅命致神祇之乏饗激朝野以歸心使屈者伸令否者泰人情大順天象至明聚東井以呈祥拱北辰而應運由是文武百辟岳牧羣賢至于比屋之倫盡祝當陽之位今則承太后慈旨守先朝遠圖撫四海九州享千齡萬祀臣等不勝大願謹上寶冊稟太后令奉皇帝踐祚臣等誠慶誠忭謹言帝就殿之東楹受羣臣稱賀先是帝在鳳翔日有瞽者張濛自言知術數事太白山神其神祠卽元魏時崔浩廟也時之否泰人之休咎濛告于神卽傳吉凶之言帝親校房髡酷信之一日濛至府聞帝語聲駭然曰非人臣也髡詢其事卽傳

神語曰三珠併一珠驢馬没人驅歲月甲庚午中興戊己土曷請解釋曰神言予不知也長興四年五月府廨諸門無故自動人頗駭異遣曷問濛濛曰衙署小異勿怪不出三日當有恩命是夜報至封潞王及帝移鎮河東甚懼問濛濛曰王保無患王思同兵至又詰之濛曰王有天下不能獨力朝廷兵來迎王也王若疑臣臣惟一子請王致之麾下以質臣心帝乃以濛攝館驛巡官至是帝受冊冊曰維應順元年歲次甲午四月庚午朔帝廻視房曷曰張濛神言甲庚午不亦異乎帝令曷共術士解三珠一珠事言三珠三帝也驢馬没人驅失位

也帝卽位之後以濛爲將作少監同正仍賜金紫以酬之帝初封潞王言事者云潞字一足已入洛矣又帝在鳳翔日有何叟者年踰七十暴卒見陰官凭几告叟曰爲我言于潞王來年三月當爲天子二十三年叟旣蘇懼不敢言逾月復卒陰官見而叱之曰安得違吾旨不達其事再放汝還退見廊廡下簿書以問主者曰朝代將易此卽陞降人爵之籍也及蘇詣帝親校劉延朗告之帝召而問之叟曰請質之此言無徵戮之可也後人云二十三蓋帝之小字也又石壕人胡杲通善天文帝召問之曰王貴不可言若舉動宜以乙未年及舉兵又

問之杲通曰今歲菡首王者不宜建功立事若俟來歲入朝則福祚永遠矣其後皆驗夫如是則大寶之位必有冥數可輕道哉丙子詔河南府率京城居民之財以助賞軍丁丑又詔預借居民五箇月房課不問士庶一槩施行帝素輕財好施自岐下爲諸軍推戴告軍士曰侯入洛人賞百千至是以府藏空匱于是有配率之令京城庶士自絕者相繼己卯衛州奏此月九日鄂王薨庚辰以宰臣劉昫判三司辛巳邢州奏磁州刺史宋令詢自經而卒令詢鄂王在藩時都押牙也故至于是甲申帝以鄂王薨行服于內園羣臣奉慰癸未太后太妃

出宮中衣服器用以助賞軍乙酉帝服袞冕御明堂殿
文武百寮朝服就位宣制改應順元年爲清泰元年大
赦天下常赦不原者咸赦除之丁亥以宣徽北院使郝
瓊爲宣徽南院使權判樞密院以前三司使王玫爲宣
徽北院使以隨駕牙將宋審虔爲皇城使劉延朗爲莊
宅使鳳翔節度判官韓昭允爲左諫議大夫充端明殿
學士觀察判官馬裔孫爲翰林學士掌書記李專美爲
樞密院直學士戊子侍衛親軍都指揮使康義誠伏誅
是日詔曰樞密使朱宏昭馮贇宣徽南院使孟漢瓊西
京畱守王思同前邠州節度使藥彥稠共相朋煽妄舉

干戈互興離間之謀幾構傾亡之禍宜行顯戮以快羣情仍削奪官爵云庚寅鳳翔奏西川孟知祥僭稱大蜀年號明德有司上言皇帝以五月朔日御明堂殿受朝三日夏至祀皇地祇前二日奏告獻祖室不坐比正旦冬至是日有祀事則次日受朝今祀在五鼓前質明行禮畢御殿在旦後請比例行之詔曰日出御殿舉祀事無妨宜依常年例史館奏凡書詔及處分公事臣下奏議望令近臣錄付當館詔端明殿學士韓昭允樞密直學士李專美錄送辛卯以左諫議大夫盧損爲右散騎常侍壬辰詔賜禁軍及鳳翔城下歸命將校錢帛各有

差

通鑑云禁軍在鳳翔歸命者自楊思權尹暉等各賜二馬一駝錢七十緡下至軍人錢二十緡其在京者

各十緡

初帝離岐下諸軍皆望以不次之賞及從至京師

不滿所望相與謠曰去卻生菩薩扶起一條鐵其無厭

如此丙申葬明宗皇帝于徽陵丁酉奉神主于太廟戊

戌山陵使司空兼門下侍郎平章事馮道上表納政不

允五月庚子朔御文明殿受朝賀乙巳以左龍武指揮

使安審琦爲左右捧聖都指揮使以右千牛上將軍符

彥饒爲左右嚴衛都指揮使丙午以端明殿學士韓昭

允爲樞密使以莊宅使劉延朗爲樞密副使以權知樞

密事房曷爲宣徽北院使以成德軍節度使大同彰國

振武威塞等軍蕃漢馬步都部署檢校太尉兼中書令
駙馬都尉石敬瑭爲北京留守河東節度使加檢校太
師兼中書令都部署如故汴州節度使檢校太師兼侍
中駙馬都尉趙延壽進封魯國公戊申中書門下奏太
常禮院狀明宗以此月二十日祔廟宰臣攝太尉行事
緣馮道在假李愚十八日私忌在致齋內劉昫又奏判

三司免祀事

五代會要清泰元年五月宰臣劉昫奏中書以近敕祠祭行事官致齋內唯祀事得

行其餘悉斷又宰臣行事致齋內不押班不赴內殿起居不知印臣緣判三司公事其祀事國忌行香伏乞特免從

詔禮官參酌有司上言李愚私忌在致齋內諸私

忌日遇大朝會入閣宣召皆赴朝參今祔廟事大忌日

屬私請比大朝會宣召例從之以陝府節度使康思立爲邢州節度使以同州節度使安重霸爲西京畱守以羽林右第一軍都指揮使春州刺史楊思權爲邠州節度使已酉左監門衛將軍孔知鄴右驍衛將軍華光裔並勒停見任時差知鄴應州告廟稱疾辭命改差光裔復稱馬墜傷足故俱罷之庚戌以司空兼門下侍郎平章事馮道爲檢校太尉同平章事充同州節度使以天雄軍節度使范延光爲樞密使封齊國公鄆州節度使李從暉爲鳳翔節度使辛亥以嚴衛都指揮使尹暉爲齊州防禦使甲寅以侍衛馬軍都指揮順化軍節度使

安從進爲河陽節度使典軍如故太常卿盧文紀奏明宗一室酌獻舞曲請名雍熙之舞從之丁巳以皇子銀青光祿大夫檢校工部尚書重美爲檢校司徒守左衛上將軍自是諸道節度使刺史文武臣察相繼加檢校官或階爵封邑以帝登位覃慶也戊午以隴州防禦使相里金爲陝州節度使初帝以檄書告藩鄰惟金遣判官薛文遇往來計事故以節鎮獎之宣徽北院使檢校工部尚書房暉加檢校司空行左威衛大將軍使如故以樞密使左諫議大夫韓昭允爲刑部尚書使如故己未太白晝見以樞密副使劉延朗爲左領軍大將軍職

如故庚申左僕射門下侍郎平章事監修國史李愚加
特進充太微宮使宏文館大學士餘如故中書侍郎兼
吏部尙書同平章事集賢院大學士判三司劉昫加門
下侍郎兼吏部尙書平章事監修國史判三司癸亥秦
州奏西川孟知祥出軍迫陷成州以宣徽南院使右驍
衛大將軍郝瓊爲左驍衛上將軍職如故以前義州刺
史張承祐爲武勝軍留後戊辰以前右龍武統軍王景
戡爲右驍衛上將軍六月庚午朔改侍衛捧聖軍爲彰
聖改嚴衛軍爲寧衛壬申封吳岳成德公爲靈應王禮
秩同五岳帝初起遣使祭岳以求祐及登阼故有是報

五代會要載中書門下奏天寶十載正月封吳山爲成德公與沂山會稽醫巫閭同封至德二載十二月改吳山爲岳祠享官屬一同五岳今國家以祈禱靈應宜示殊禮臣等商量請加封爲靈應王從之幽州節

度使趙德鈞進封北平王青州節度使房知溫進封東平王癸酉以前鄆州節度使索自通爲右龍武統軍甲戌皇子左衛上將軍重美加檢校太保同平章事充鎮州節度使兼河南尹判六軍諸衛事丁丑詔天下見禁罪人委所在長吏躬親慮問疾速疏決庚辰幸至德宮因幸房知溫安元信范延光索自通李從敏第壬午以檢校太子太傅致仕王建立爲檢校太尉兼侍中鄆州節度使以前宋州節度使安元信爲檢校太尉兼侍中

潞州節度使癸未三司使劉昫奏天下戶民自天成二
年括定秋夏田稅迨今八年近者相次有百姓詣闕訴
田不均累行蠲放漸失稅額望差朝臣一槩檢視不報
甲申帝爲故皇子亳州刺史重吉皇長女尼惠明大師
幼澄舉哀行服羣臣詣閣門奉慰帝起兵之始重吉幼
澄俱爲閔帝所害乙酉以戶部侍郎韓彥憚爲絳州刺
史以左武衛上將軍李肅爲單州刺史丙戌襄州節度
使趙在禮加同平章事甲午以武勝軍留後張承祐爲
華州節度使以皇城使宋審虔爲壽州節度使充侍衛
步軍都指揮使以右衛上將軍劉仲殷爲宋州節度使

以待衛步軍都指揮使壽州節度使皇甫遇爲鄧州節度使以前華州節度使華溫琪爲太子太傅致仕丁酉左神武統軍周知裕卒贈太傅是月京師大旱熱甚暵死者百餘人秋七月庚子太子少保致仕崔沂卒癸卯鳳翔進僞蜀孟知祥來書稱大蜀皇帝獻書于大唐皇帝且言見迫羣情以今年四月十二日卽皇帝位云帝不答以前武州刺史鄭琮爲右衛上將軍甲辰幸龍門佛寺禱雨乙巳皇子故亳州團練使重吉贈太尉仍于宋州置廟丁未鳳翔節度使李從曠封西平王是日宰臣李愚劉昫因論公事于政事堂相詬辭甚鄙惡帝令

樞密副使劉延朗宣諭曰卿等輔弼之臣不宜如是今
後不得更然辛亥以太常卿盧文紀爲中書侍郎平章
事是日中書門下三上章請立中宮從之丁巳制立沛
國夫人劉氏爲皇后庚申太子少傅陳臯卒乙丑史官
張昭遠以所撰莊宗朝列傳三十卷上之八月庚午詔
蠲放長興四年十二月已前天下所欠殘稅辛未以前
尙書左丞姚顗爲中書侍郎平章事詔應曾受御署官
逐攝同一任正官依期限赴選

徐無黨五代史注云御署官疑是廢帝初舉兵

時所置之官以其非吏部正授故須有旨方得選

荆南奏僞蜀孟知祥卒其子

以前工部侍郎楊凝式爲禮部侍郎甲戌以前金州防禦使婁繼英爲右神武統軍以右神武統軍高允貞爲左神武統軍乙亥以翰林學士承旨工部尙書知制誥李懌爲太常卿以翰林學士戶部侍郎知制誥程遜爲學士承旨甲申以兵部侍郎龍敏爲吏部侍郎以秘書監崔居儉爲工部尙書乙酉以右武衛上將軍張繼祚爲右衛上將軍以右驍衛上將軍王景戡爲右衛上將軍以右領衛上將軍劉衛爲左武衛上將軍以右千牛上將軍王陟爲右領軍上將軍以司農卿兼通事舍人判四方館事王景崇爲鴻臚卿依前通事舍人判四方

館丁亥右龍武統軍索自通卒辛卯禮部尚書致仕李
光憲卒甲午以太子少傅盧質爲太子少師乙未以前
邢州節度使趙鳳爲太子太保詔文武百官差使宜令
依倫次中書置簿不得重疊若當使者自緣有事或不
欲行者注簿便當一使自長興三年正月後已曾奉使
者便爲簿首已後差者次第注之有司上言皇后受冊
內外命婦上牋無答教從之丙申御文明殿冊皇后命
使攝太尉宰臣盧文紀使副攝司徒右諫議大夫盧損
詣皇后宮行禮畢恩賜有差九月己亥以久雨分命朝
臣營都城門告宗廟社稷辛丑夜有星如五斛器西南

流尾迹長數丈屈曲如龍形又衆星亂流不可勝數京師大雨雹如彈丸曹州刺史藥縱之卒甲辰以霖霖甚詔都下諸獄委御史臺憲錄問諸州縣差判官令錄親自錄問畫時疏理壬子中書門下舉行長興三年勅常年薦送舉人州郡行鄉飲酒之時帖太常草定儀注奏聞甲寅以前潞州節度使檢校太尉同平章事盧文進爲安州節度使己未雲州奏契丹寇境冬十月辛未有雉金色止于中書政事堂中書門下奏請以正月二十三日皇帝誕慶日爲千春節從之戊寅宰臣李愚劉昫罷相以愚守左僕射昫守右僕射契丹寇雲應州詔河

東節度使石敬瑭率兵屯代州戊子宰臣姚顥奏吏部
三銓近年併爲一司望令依舊分銓從之辛卯以左衛
上將軍李宏元卒廢朝贈司徒癸巳以禮部郎中知制
誥呂琦守本官充樞密院直學士十一月辛丑以刑部
侍郎鄭韜光爲尚書右丞以光祿少卿烏昭遠爲少府
監秦州節度使張延朗奏率師伐蜀中書門下奏二十
六日明宗忌陛下初遇忌辰不同常歲請于忌辰前後
各一日不坐朝從之御史臺奏前任節度使刺史行軍
副使雖每日于便殿起居每遇五日起居亦合綴班從
之丙午以前興州刺史馮暉配同州衙前安置暉爲興

州刺史屯乾渠蜀人來侵暉自屯所奔歸鳳翔故有是
責丁未詔振武新州河東西北邊經契丹蹂踐處放免
三年兩稅差配時契丹初退故也癸丑以前華州節度
使王萬榮爲左驍衛上將軍致仕甲寅以振武節度使
楊光遠充大同彰國振武威塞等軍兵馬都虞候以前
右金吾大將軍穆延暉爲右武衛上將軍壬戌以禮部
侍郎楊凝式爲戶部侍郎甲子以中書舍人盧導爲禮
部侍郎十二月丁卯朔詔修奉本朝諸帝陵寢己巳以
北面馬軍都指揮使易州刺史安叔千爲安北都護振
武節度使以齊州防禦使尹暉爲彰國軍節度使庚午

詔葬庶人從榮有司上言依貞觀中庶人承乾以公禮

葬從之乙亥以秦州節度使張延朗爲中書侍郎同平

章事判三司

五代會要二年三月辛臣張延朗奏臣判三司公事每日內殿祗候其合綴前班押

班伏乞特免從之

以中書侍郎平章事盧文紀爲門下侍郎平

章事監修國史以中書侍郎平章事姚顥兼集賢院大

學士以前邠州節度使康福爲秦州節度使丙戌夜有

白氣東西亘天庚寅幸龍門祈雪自九月至是無雨雪

故也

舊五代史卷四十六攷證

唐末帝紀上末帝諱從珂本姓王氏鎮州人也母宣憲
皇后魏氏以光啟元年歲在己巳正月二十三日生
帝于平山景福中明宗爲武皇騎將略地至平山遇
魏氏擄之帝時年十餘歲明宗養爲己子 案通鑑
攷異引唐廢帝實錄云廢帝諱從珂明宗之元子也
母曰宣憲皇后魏氏鎮州平山人中和末明宗徇地
山東畱戍平山得魏后帝以光啟元年正月二十三
日生於外舍屬用兵不息音問阻絕帝甫十歲方得
歸宗今攷五代會要歐陽史通鑑諸書皆作養子惟

實錄作元子疑因太后令稱爲皇長子而傳會也

二十三日次靈口

靈口通鑑唐紀作零口攷冊府元

龜亦作靈口今仍其舊

二十七日次陝州

案歐陽史作己巳次陝州是書閱

帝紀作丁卯通鑑從是書

夏四月壬申帝至蔣橋文武百官立班奉迎

案通鑑

四月庚午朔太后令內諸司至乾壕迎潞王攷異引

廢帝實錄作三月三十日

癸酉皇太后下令降閔帝爲鄂王

案通鑑攷異引閔

帝實錄七日廢帝爲鄂王廢帝實錄作癸酉薛歐二

史從廢帝實錄

潞字一足已入洛矣 洛原本訛潞今據冊府元龜改

正

甲申 案甲申疑當作壬午以下文卽癸未也

舊五代史卷四十六攷證

舊五代史卷四十七

宋門下侍郎參知政事監修國史薛居正等撰

唐書第二十三

末帝紀中

清泰二年春正月丙申朔帝御明堂殿受朝賀仗衛如
式乙巳中書門下奏遇千春節凡刑獄公事奏覆候次
月施行今後請重繫者卽候次月輕繫者卽節前奏覆
決遣從之戊申宗正寺奏北京應州曹州諸陵望差本
州府長官朝拜五代會要載宗正寺原奏云北京永興
長寧建極三陵應州遂衍奕三陵準曹
州溫陵例下本雍坤和徽四陵差太常宗正卿朝拜從
州府官朝拜

之巳酉北京奏光祿卿致仕周元豹卒庚申鄴都進天

王甲帝在藩時有相士言帝如毗沙天王帝知之竊喜

及卽位選軍士之魁偉者被以天王甲俾居宿衛因詔

諸道造此甲而進之三司奏添徵蠶鹽錢及增麴價先

是麴斤八十文增至一百五十文乙丑雲州節度使張

溫移鎮晉州以西京畱守安重霸爲雲州節度使二月

庚午定州節度使王從溫移鎮兗州振武軍節度使楊

檀移鎮定州兼北面行營馬步都虞候甲戌以定州節

度使李周爲京兆尹充西京畱守以樞密使天雄軍節

度使范延光爲檢校太師兼中書令充汴州節度使皇

子鎮州節度使兼河南尹判六軍諸衛事左右街坊使

重美加檢校太尉同平章事充天雄軍節度使餘如故

辛巳以右諫議大夫盧損爲御史中丞以御史中丞張

鵬爲刑部侍郎壬午寧遠軍節度使馬存加兼侍中鎮

南軍節度使馬希振加兼中書令詔順義軍節度使姚

彥章加兼侍中己丑宰臣盧文紀等上皇妣魯國太夫

人尊諡曰宣憲皇太后請擇日冊命從之三月戊戌故

太子太保趙鳳贈太傅辛丑以前汴州節度使趙延壽

爲許州節度使兼樞密使以夏州行軍司馬李彝殷爲

本州節度使兄彝超卒故也癸卯以靜海軍節度使檢

校太師兼中書令安南都護錢元球爲畱守太保餘如
故丙午以給事中趙光輔爲右散騎常侍戊申皇妹魏
國夫人石氏封晉國長公主齊國公主趙氏封燕國長
公主己酉有司上言宣憲皇后未及山陵權于舊陵所
建廟從之辛亥功德使奏每年誕節諸州府奏薦僧道
其僧尼欲立講論科講經科表白科文章應制科持念
科禪科聲贊科道士欲立經法科講論科文章應制科
表白科聲贊科焚修料以試其能否從之丙辰以右龍
武統軍李德珣爲涇州節度使庚申以鎮州節度使知
軍府事董溫琪爲鎮州節度使檢校太保壬戌以左右

彰聖都指揮使富州刺史安審琦領楚州順化軍節度使軍職如故審琦受閔帝命西征至鳳翔而降故有是命是月太常丞史在德上疏言事其略曰朝廷任人率多濫進稱武士者不閑計策雖破堅執銳戰則棄甲窮則背軍稱文士者鮮有藝能多無士行問策謀則杜日作文字則倩人所謂虛設具員枉耗國力逢陛下惟新之運是文明革弊之秋臣請應內外所管軍人凡勝衣甲者請宣下本部大將一一考試武藝短長權謀深淺居下位有將才者便拔爲大將居上位無將略者移之下軍其東班臣僚請內出策題下中書令宰臣面試如

下位有大才者便拔居大位處大位無大才者卽移之
下僚其疏大約如此盧文紀等見其奏不悅班行亦多
憤悻故諫官劉濤楊昭儉等上疏請出在德疏辨可否
宣行中書覆奏亦駁其錯誤帝詔學士馬裔孫謂曰史
在德語太凶其實難容朕初臨天下須開言路若朝士
以言獲罪誰敢言者爾代朕作詔勿加在德之罪詔曰
左補闕劉濤等奏太常丞史在德所上章疏中書門下
駁奏未奉宣諭乞特施行分明黜陟朕嘗覽貞觀故事
見太宗之治理以貞觀昇平之運太宗明聖之君野無
遺賢朝無闕政盡善盡美無得而名而陝縣丞皇甫德

參輒上封章恣行訕謗人臣無禮罪不容誅賴文貞之
彌縫恕德參之狂瞽魏徵奏太宗曰陛下思聞得失只
可恣其所陳若所言不中亦何損于國家朕每思之誠
要言也遂得下情上達德盛業隆太宗之道彌光文貞
之節斯著朕惟寡昧獲奉宗祧業業兢兢懼不克荷思
欲率循古道簡拔時材懷忠抱直之人虛心渴見便佞
詭隨之說杜耳惡聞史在德近所獻陳誠無避忌中書
以文字紕繆比類僭差改易人名觸犯廟諱請歸憲法
以示戒懲蓋以中書既委參詳合盡事理朕繼承前緒
誘勸將來多言數窮雖聖祖之所戒千慮一得冀愚者

之可從因覽文貞之言遂寬在德之罪已令停寢不遣
宣行劉濤等官列諫垣宜陳讜議請定短長之理以行
黜陟之文昔魏徵則請賞德參今濤等請黜在德事同
言異何相遠哉將議允俞恐虧開納方朝廷粗理俊乂
畢臻畱一在德不足爲多去一在德未足爲少苟可懲
勸朕何憂焉但緣情在傾輸理難黜責濤等敷奏朕亦
優容宜體含宏勉思竭進凡百在下悉聽朕言夏四月
辛巳宰臣判三司張延朗奏州縣官徵科條格其令錄
在任徵科依限了絕一年加階兩年與試銜三年皆及
限了絕與服色攝任者一年內了絕及攝二年三年內

皆及限與真命其主簿同縣令條本判官一年加階二年改試銜三年轉官本曹官省限內了絕與試銜諸節級三年內並了絕者與賞錢三十貫其責罰依天成四年五月五日勅施行從之癸未御史中丞盧損等進清泰元年以前十一年制勅堪悠久施行者三百九十四道編爲三十卷其不中選者各令所司封閉不得行用詔其新編勅如可施行付御史臺頒行以宰相盧文紀兼太微宮使宏文館大學士姚顛加門下侍郎監修國史張延朗兼集賢殿大學士以樞密使韓昭允爲中書侍郎兼兵部尙書平章事乙酉以前武勝軍節度使張

萬進爲鄜州節度使辛卯以宣徽南院使劉延皓爲刑部尚書充樞密使以司天監耿瑗爲太府卿以僞蜀右衛上將軍胡杲通爲司天監以宣徽北院使房暉爲左衛上將軍充宣徽南院使以樞密副使劉延朗爲左領軍上將軍充宣徽北院使兼樞密副使五月丙申新州振武奏契丹寇境乙巳詔天下見禁囚徒自五月十二日以前除十惡五逆放火燒舍持仗殺人官典犯贓僞行印信合造毒藥并見欠省錢外罪無輕重一切釋放庚戌詔不得貢奉寶裝龍鳳雕鏤刺作組織之物中書奏準勅凡廟諱但迴避正文其偏旁文字不在減少點

畫今定州節度使楊檀檀州金壇等名酌情制宜並請改之其表章文案偏旁字關典畫凡臣寮名涉偏旁亦請改名詔曰偏旁文字音韻懸殊止避正呼不宜全改楊檀賜名光遠餘依舊甲寅以戶部侍郎楊凝式爲秘書監以尚書禮部侍郎盧導爲尚書右丞以尚書右丞鄭韜光爲尚書左丞丙辰以端明殿學士李專美爲兵部侍郎以端明殿學士李崧爲戶部侍郎以翰林學士馬裔孫爲禮部侍郎以禮部郎中充樞密院直學士呂琦爲給事中並充職如故太子少保致仕任圜贈尚書右僕射以順化軍節度使兼彰聖都指揮使北面行營

排陣使安審琦爲邢州節度使庚申以兵部尚書李鏐爲太常卿以禮部尚書王權爲戶部尚書以太常卿李惲爲禮部尚書癸亥以六軍諸衛判官給事中張允爲右散騎常侍六月甲子朔新州上言契丹入寇乙丑有司上言宣憲皇太后陵請以順從爲名從之振武奏契丹二萬騎在黑榆林丁卯以太子少保致仕朱漢賓卒廢朝壬申命史官修撰明宗實錄契丹寇應州以新州節度使楊漢賓爲同州節度使以前晉州節度使翟璋爲新州節度使庚辰北面招討使趙德鈞奏行營馬步軍都虞候定州節度使楊光遠行營排陣使邢州節度

使安審琦帥本軍至易州見進軍追襲契丹次河東節
度使石敬瑭奏邊軍乏芻糧其安重榮巡邊兵士欲移
振武就糧從之尋又奏懷孟租稅請指揮于忻代州輸
納朝廷以邊儲不給詔河東戶民積粟處量事抄借仍
于鎮州支絹五萬匹送河東充博采之直是月北面轉
運副使劉福配鎮州百姓車子一千五百乘運糧至代
州時水旱民飢河北諸州困于飛輓逃潰者甚衆軍前
使者繼至督促糧運由是生靈咨怨辛巳詔諸州府署
醫博士丙戌以前許州節度使李從昶爲右龍武統軍
以前彰國軍節度使沙彥珣爲右神武統軍秋七月丙

申石敬瑭奏斬挾馬都指揮使李暉等三十六人以謀

亂故也時敬瑭以兵屯忻州一日軍士喧譟遽呼萬歲

乃斬暉等以止之

契丹國志契丹屢攻北邊時石敬瑭將大兵屯忻州潞王遣使賜軍士夏

衣傳詔撫諭軍士呼萬歲者數四敬瑭懼幕僚殺希堯請誅其倡者敬瑭命劉知遠斬三十六人以殉潞王聞

益疑御史中丞盧損奏準天成二年七月勅每月首十

五日入閣罷五日起居臣以爲中旬排仗有勞聖躬請

只以月首入閣五日起居依舊又準天成三年五月長

興二年七月勅許諸州節度使帶使相歲薦寮屬五人

餘薦三人防禦團練使薦二人今乞行釐革又長興二

年八月勅州縣佐官差充馬步判官仍同一任乞行止

絕依舊衙前選補詔曰今後藩臣帶使相許薦三人餘
薦二人直屬京防禦團練使薦一人餘並從之丁酉回
紇可汗仁美遣使貢方物西京弓弩指揮使任漢權奏
六月二十一日與川軍戰于金州之漢陰王師不利其
部下兵士除傷瘐外已至鳳翔先是盩厔鎮將劉贊引
軍入川界爲蜀將全師郁所敗金州都監崔處訥重傷
諸州屯兵潰散金州防禦使馬全節收合州兵固守獲
全以樞密使劉延皓爲天雄軍節度使甲辰以右神武
統軍沙彥珣權知雲州乙巳以徐州節度使張敬達充
北面行營副總管時契丹入邊石敬瑭屢請益兵朝廷

軍士多在北鄙俄聞忻州諸軍呼譟帝不悅乃命敬達
爲北軍之副以減敬瑭之權也丁巳宰臣盧文紀等上
疏其略曰臣近蒙召對面奉天旨凡軍國庶事利害可
否卿等合盡言者臣等謬處台衡奉行制勅但緣事理
互有區分軍戎不在于職司錢穀非關于局分苟陳異
見卽類侵官况才不濟時職非經遠因五日起居之例
于兩班旅見之時略獲對敷兼承顧問衛士周環于階
陛庶臣羅列于殿庭四面聚觀十手所指臣等苟欲各
伸愚短此時安敢敷陳韓非昔懼于說難孟子亦憂于
言責臣竊奉本朝故事肅宗初平寇難再復寰瀛頗經

涉于艱難尤勤勞于委任每正衙奏事則泛咨訪于羣臣及便殿詢謀則獨對敷于四輔自上元年後于長安東內置延英殿宰臣如有奏議聖旨或有特宣皆于前一日上聞對御之時祇奉冕旒旁無侍衛獻可替否得曲盡于討論捨短從長故無虞于漏洩君臣之際情理坦然伏望聖慈俯循故事或有事關軍國謀繫否臧未果決于聖懷要詢訪于臣輩則請依延英故事前一日傳宣或臣等有所聽聞切關利害難形文字須面敷敷臣等亦依故事前一日請開延英當君臣奏議之時祇請機要臣寮侍立左右兼乞稍霽威嚴恕臣荒拙雖乏

鷹鷂之効庶盡葵藿之心詔曰卿等濟代英才鎮時碩德或締構于興王之日或經綸于纘聖之時鹽梅之任俱崇藥石之言並切請復延英之制以伸議政之規而況列聖遺芳皇朝盛事載詳徵引良切歎嘉恭惟五日起居先皇垂範俟百寮之俱退召四輔以獨昇接以溫顏詢其理道計此時作事之意亦昔日延英之流朕叨獲嗣承切思遵守將成其美不爽兼行其五日起居仍令仍舊尋常公事亦可便舉奏聞或事屬機宜理當秘密量事繁慢不限隔日及當日便可于閣門祇候具勝子奏聞請面敷敷卽當盡屏侍臣端居便殿佇聞高議

以慰虛懷朕或要見卿時亦令當時宣召但能務致理之實何必拘延英之名有事足可以討論有言足可以陳述宜以沃心爲務勿以逆耳爲虞勉罄謀猷以裨寡昧帝性仁恕聽納不倦嘗因朝會謂盧文紀等曰朕在藩時人說唐代爲人主端拱而天下治蓋以外恃將校內倚謀臣故端拱而事辦朕荷先朝鴻業卿等先朝舊臣每一相見除承奉外略無社稷大計一言相救坐視朕之寡昧其如宗社何文紀等引咎致謝因奏延英故事故有是詔八月庚午滑州節度使高允韜卒壬申以右衛上將軍王景戡爲左衛上將軍以右神武統軍婁

繼英爲右衛上將軍巳卯以西上閤門使行少府少監兼通事舍人蘇繼顏爲司農卿職如故辛巳以權知雲州右神武統軍沙彥珣爲雲州節度使鄴都殺人賊陳延嗣并母妹妻等并棄市延嗣父子相承與其妹妻于諸州郡誘人殺之而奪其財前後被殺者數百人至是事世而誅之癸未以前潞州行軍司馬陳元爲將作監以元善醫故有是命丁亥以洛州團練使李彥舜爲義武軍節度使檢校太傅太原奏達鞞部族于靈邱安置巳丑以太子少保致仕戴思遠卒廢朝庚寅以前兗州節度使楊漢章爲左神武統軍以前邢州節度使康思

立爲右神武統軍潞州奏前雲州節度使安重霸卒九月己亥以河陽節度使侍衛馬軍都指揮使安從進爲襄州節度使以襄州節度使趙在禮爲宋州節度使癸卯以忠正軍節度使侍衛步軍都指揮使宋審虔爲河陽節度使典軍如故己酉禮部貢院奏進士請夜試童子依舊表薦重置明算道舉舉人落第後別取文解五科試紙不用中書印用本司印並從之以宣徽南院使房暉爲刑部尚書充樞密使以宣徽北院使充樞密副使劉延朗爲宣徽南院使充樞密副使丙辰以左僕射李愚卒廢朝冬十月丁卯幸崇道宮甘泉亭己巳以左

衛上將軍李頃爲左領軍上將軍北面行營總管石敬瑭奏自代州歸鎮庚午以晉州節度使張溫卒廢朝甲戌幸趙延壽張延朗第丁丑以端明殿學士兵部侍郎李專美爲秘書監充宣徽北院使庚寅以左諫議大夫唐訥爲左散騎常侍十一月庚子以左驍衛上將軍郝瓊爲左金吾上將軍以光祿卿王玟爲太子賓客以徐州節度使張敬達爲晉州節度使依前充大同振武威塞彰國等軍兵馬副總管丁未以秘書少監丁濟爲太子詹事乙卯以前金州防禦使馬全節爲滄州留後

通鑑

劉延朗欲除全節絳州刺史羣議沸騰帝聞之以爲橫海留後

渤海國遣使朝貢十二

月戊辰禁用鉛錢壬申以中書侍郎兼兵部尚書充樞密使韓昭允爲檢校司空同平章事充河中節度使甲戌以宗正少卿李延祚爲將作監致仕丁丑故武安軍州節度使累贈太傅劉建峯贈太尉從湖南之請也戊寅太常奏來年正月一日上辛祀昊天上帝于圜丘依禮大祠不朝詔曰祀事在質明前儀仗在日出後事不相妨宜依常年受朝壬午以翰林學士承旨戶部侍郎程遂爲兵部侍郎翰林學士工部侍郎崔稅爲戶部侍郎翰林學士中書舍人和凝爲工部侍郎並依前充職乙酉以前秘書監楊凝式爲兵部侍郎己丑以前同州

節度使馮道爲司空以尚書右僕射劉昫爲左僕射以
太子少師盧質爲右僕射以兵部侍郎馬縞兼國子祭
酒

舊五代史卷四十七攷證

唐末帝紀中枉耗國力 枉耗通鑑注引薛史作枉費
攷冊府元龜亦作枉耗今仍其舊

辛卯以宣徽南院使劉延皓爲刑部尚書充樞密使

案劉延皓充樞密使歐陽史作五月與是書繫四月
異通鑑從是書

侍衛步軍都指揮使宋審虔 宋審虔原本脫虔字今
據通鑑增入

渤海國遣使朝貢 案歐陽史作九月乙卯渤海遣使
者來五代會要作十二月渤海遣使列周卿等人朝

貢方物俱與是書作十一月異

翰林學士工部侍郎崔稅 崔稅原本訛崔櫓今據歐

陽史改正

舊五代史卷四十七攷證

舊五代史卷四十八

宋門下侍郎參知政事監修國史薛居正等撰

唐書第二十四

末帝紀下

清泰三年春正月辛卯朔帝御文明殿受朝賀仗衛如
式乙未百濟遣使獻方物戊戌幸龍門佛寺祈雪癸卯
以給事中充樞密院直學士呂琦爲端明殿學士以六
軍諸衛判官尚書工部郎中薛文遇爲樞密院直學士
乙巳以上元夜京城張燈帝微行置酒于趙延壽之第
丁未皇子河南尹判六軍諸衛事重美封雍王己未以

前司農卿王彥鎔爲太僕卿二月戊辰吐渾寧朔兩府

畱後李可久加檢校司徒可久本姓白氏前朝賜姓庚

午監修國史姚顛史官張昭遠李祥吳承範等修撰明

宗實錄三十卷上之

五代會要同修撰官中書舍人張昭遠李祥直館左拾遺吳承範右

拾遺楊昭儉等各頒賚有差

以大理卿竇維爲光祿卿以前許州節

度判官張登爲大理卿丁丑以太常卿李鱗爲兵部尚

書以兵部尚書梁文矩爲太常卿庚辰以前鄜州節度

使皇甫立爲潞州節度使辛巳以前均州刺史仇暉爲

左威衛上將軍保順軍節度使鮑君福加檢校太尉同

平章事丁亥以昭義節度使安元信卒廢朝三月庚子

中書門下奏準閣門分析內外官辭見謝規例諸州判
官軍將進奉到闕舊例門見門辭今後只令朝見依舊
門辭新除諸道判官書記以下無例中謝並放謝放辭
得替到京無例見今後兩使判官許中謝赴任卽門辭
其書記以下並依舊例朝臣文五品武四品以上舊例
中謝其以下無例對謝今請依天成四年正月勅入升
朝官並許中謝諸道都押衙馬步都指揮虞候鍾將諸
色場院無例謝辭並進膀子放謝放辭得替到闕無例
入見在京鹽麩稅官兩官巡卽許中謝新除令錄並中
謝次日門辭兼有口勅誠勵文武兩班所差弔祭使及

告廟祠祭只在衙辭不赴內殿諸道進奏官到闕見得
假進膀子門辭從之辛丑權知福建節度使王昶奏節
度使王延鈞以去年十月十四日卒是時延鈞父子雖
僭竊于閩嶺猶稱藩于朝廷故有是奏甲辰以右神武
統軍楊漢章爲彰武軍節度使丙午以翰林學士禮部
侍郎馬裔孫爲中書侍郎同平章事丁巳以端明殿學
士呂琦爲御史中丞

案通鑑呂琦與李崧建和親契丹之策爲薛文遇所沮改爲御史中

丞蓋疎之也

戊午御史中丞盧損責授右贊善大夫知雜侍

御史韋稅責授太僕寺丞侍御史魏遜責授太府寺主
簿侍御史王岳責授司農寺主簿初延州保安鎮將白

文審聞兵興岐下專殺郡人趙思謙等十餘人已伏其罪復下臺追繫推鞠未竟會去年五月十二日德音除十惡五逆放火殺人外並放盧損輕易卽破械釋文審帝大怒收文審誅之臺司稱奉德音釋放不得追領祇證中書詰云德音言不在追窮枝蔓無不得追領祇證六字擅改勅語大理斷以失出罪人論故有是命是月有蛇鼠鬪于師子門外鼠生而蛇死夏四月己未朔以左衛上將軍王景戡爲左神武統軍以右領軍上將軍李頃爲華清宮使戊辰以太子詹事盧演爲工部尚書致仕辛未以中書舍人史館修撰張昭遠爲禮部侍郎

以前滄州節度使李金全爲右領軍上將軍是月有熊入京城搏人五月辛卯以河東節度使兼大同彰國振武威塞等軍蕃漢馬步總管檢校太師兼中書令駙馬都尉石敬瑭爲鄆州節度使進封趙國公以河陽節度使充侍衛馬步軍都指揮使宋審虔爲河東節度使甲午以前晉州節度使大同彰國振武威塞等軍蕃漢副總管張敬達充西北面蕃漢馬步都部署落副總管乙未詔諸州兩使判官畿赤令有關取省郎遺補丞博少列宮寮選擇擢任以忠正軍節度使侍衛步軍都指揮使張彥琪爲河陽節度使充侍衛馬軍都指揮使以彰

聖都指揮使饒州刺史符彥饒爲忠正軍節度使充侍
衛步軍都指揮使丙申以雍王重美與汴州節度使范
延光結婚詔究王從溫主之丁酉以國子祭酒馬縞卒
廢朝戊戌昭義奏河東節度使石敬瑭叛以鴻臚卿兼
通事舍人判四方館王景崇爲衛尉卿充引進使壬寅
削奪石敬瑭官爵便令張敬達進軍攻討乙卯以晉州
節度使張敬達爲太原四面兵馬都部署尋改爲招討
使以河陽節度使侍衛馬軍都指揮使張彥琪爲太原
四面馬步軍都指揮使以邢州節度使安審琦爲太原
四面馬軍都指揮使以陝州節度使相里金爲太原四

面步軍都指揮使以右監門上將軍武廷翰爲壕寨使
丙辰以定州節度使楊光遠爲太原四面兵馬副部署
兼馬步都虞候尋改爲太原四面副招討使都虞候如
故以前彰武軍節度使高行周爲太原四面招撫兼排
陣使初帝疑河東有異志與近臣語及其事帝曰石郎
與朕近親在不疑之地流言毀譽朕心自明萬一失歡
如何和解左右皆不對翼日欲移石敬瑭于鄆州房暘
等堅言不可司天監趙延乂亦言星辰失度尤宜安靜
由是稍緩其事會薛文遇獨宿于禁中帝召之諭以太
原之事文遇奏曰臣聞作舍于道三年不成國家利害

斷自宸旨以臣料之石敬瑭除亦叛不除亦叛不如先
事圖之帝喜曰聞卿此言豁吾憤氣先是有人言國家
明年合得一賢佐主謀平定天下帝意亦疑賢佐者屬
在文遇卽令手書除日子夜下學士院草制翼日宣制
之際兩班失色居六七日敬瑭上章云明宗社稷陛下
纂承未契輿情宜推令辟許王先朝血緒養德皇闡儻
循當璧之言免負闕墻之議帝覽奏不悅手攘抵地召
馬裔孫草詔報曰父有社稷傳之于子子君有禍難倚之
于親卿于鄂王故非疏遠往歲衛州之事天下皆知今
朝許王之言人誰肯信英賢立事安肯如斯云戊申張

敬達奏西北面先鋒都指揮使安審信率雄義左第二
指揮二百二十七騎并部下共五百騎剽劫百井叛入
太原又奏大軍已至太原城下詔安審信及雄義兵士
妻男並處斬家產沒官先是雄義都在伏州屯戍其指
揮使安元信謀殺伏州刺史張朗事洩戍兵自潰奔安
審信軍審信與之入太原太常奏于河南府東權立宣
憲太后寢宮從之己酉振武節度使安叔干奏西北界
巡檢使安重榮驅掠戍兵五百騎叛入太原以新授河
東節度使宋審虔爲宣州節度使充侍衛馬軍都指揮
使壬子鄴都屯駐捧聖都虞候張令昭逐節度使劉延

皓據城叛翼日令昭召副使邊仁嗣已下逼令奏請節
旄六月辛酉天雄軍節度使劉延皓削奪官爵勒歸私
第癸亥以天雄軍守禦右捧聖第二軍都虞候張令昭
爲檢校司空行右千牛將軍權知天雄軍府事丙寅御
敷政殿遣工部尚書崔居儉奉宣憲皇太后寶冊于寢
宮時陵園在河東適會兵興故權于京城修奉寢宮上
諡焉己巳以西上閣門副使少府監兼通事舍人劉頎
爲鴻臚卿職如故庚午詔曰時雨稍愆頗傷農稼分命
朝臣祈禱辛未工部尚書致仕許寂卒以權知魏府事
右千牛將軍張令昭爲齊州防禦使以捧聖右第三指

揮使邢立爲德州刺史以捧聖第五指揮使康福進爲
鄭州刺史甲戌以汴州節度使范延光爲天雄軍四面
招討使知行府事丙子以西京畱守李周爲天雄軍四
面副招討使兼兵馬都監詔河東將佐節度判官趙瑩
以下十四人並籍沒家產秋七月戊子范延光奏領軍
至鄴都攻城次己丑誅右衛上將軍石重英皇城副使
石重裔皆敬瑭之子也時重英等匿于民家井中獲而
誅之并族所匿之家奚首領達喇罕遣通事介老奏奚
王李素姑謀叛入契丹已處斬訖達喇罕權知本部落
事辛卯沂州奏誅都指揮使石敬德并族其家敬瑭之

弟也乙未以前彰武軍節度使高行周爲潞州節度使
充太原四面招撫排陣使以潞州節度使皇甫立爲華
州節度使丁酉雲州節度使沙彥珣奏此月二日夜步
軍指揮使桑遷作亂以兵圍子城彥珣突圍出城就西
山據雷公口三日招集兵士入城誅亂軍軍城如故辛
丑以將作監丞介國公宇文頡爲汝州襄城令乙巳以
衛尉卿聶延祚爲太子賓客戊申范延光奏此月二十
一日收復鄴都羣臣稱賀己酉以禮部侍郎張昭遠爲
御史中丞以御史中丞呂琦爲禮部侍郎充端明殿學
士庚戌中書奏劉延皓賓佐等帥臣旣已削奪其行軍

司馬李延筠副使邊仁嗣以下望命放歸田里奏入帝大怒詔大理曰帥臣失守已行削奪其寮佐合當何罪既而竟依中書所奏壬子詔范延光誅張令昭部下五指揮及忠銳忠肅兩指揮繼范延光奏追兵遣襲張令昭部下敗兵至邢州沙河斬首三百級并獻張令昭邢立李貴等首級又奏獲張令昭同惡捧聖指揮使米全以下諸指揮使都頭凡十三人并磔于府門癸丑左衛上將軍仇暉卒洺州奏擒獲魏府作亂捧聖指揮使馬彥柔以下五十八人邢磁州相次擒獲亂兵並送京師彰聖指揮使張萬迪以部下五百騎叛入太原詔誅家

屬于懷州本營八月戊午契丹遣使摩哩入朝己未以
汴州節度使范延光爲天雄軍節度使守太傅兼中書
令以西京畱守李周爲汴州節度使檢校太尉同平章
事癸亥應州奏契丹三千騎迫城詔端明殿學士呂琦
往河東忻代諸屯戍所犒軍以左龍武大將軍袁義爲
右監門上將軍以振武軍節度使安叔千充代北兵馬
都部署己巳雲州沙彥珣奏供奉官李讓勳送夏衣到
州縱酒凌轢軍都行劫殺兵馬都監張思慤都指揮使
党行進其李讓勳已處斬訖張敬達奏造五龍橋攻太
原城次戊寅以鎮州節度使董溫琪充東北面副招討

使已卯洺州獻野蠶二十勛辛巳張敬達奏賊城內出
騎軍三十隊步卒三千人衝長連城高行周襲殺入壕
溺死者大半擒賊將安小喜以下百餘人甲馬一百八
十匹九月甲辰張敬達奏此月十五日與契丹戰于太
原城下王師敗績時契丹主自率部族來援太原高行
周符彥卿率左右廂騎軍出鬪蕃軍引退巳時後蕃軍
復成列張敬達楊光遠安審琦等陣于賊城西北倚山
橫陣諸將奮擊蕃軍屢卻至晡我騎軍將移陣蕃軍如
山而進王師大敗投兵仗相藉而死者山積是夕收合
餘眾保于晉祠南晉安寨蕃軍塹而圍之自是音聞阻

絕朝廷大恐是日遣侍衛步軍都指揮使符彥饒率兵屯河陽詔范延光率兵由青山路趨榆次詔幽州趙德鈞由飛狐路出敵軍後輝州防禦使潘環合防戍軍出磁隰以援張敬達以前絳州刺史韓彥憚爲太子賓客契丹主移帳于柳林乙巳詔取二十二日幸北面軍前戊申帝發京師路經徽陵帝親行謁奠夕次河陽召羣臣議進取盧文紀勸帝駐河橋庚戌樞密使趙延壽先赴潞州辛亥幸懷州召吏部侍郎龍敏訪以機事敏勸帝立東丹王贊華爲契丹主以兵援送入蕃則契丹主有後顧之患不能久駐漢地矣帝深以爲然竟不行其

謀遼史義宗傳云倍雖在異國常思其親問安之使不絕後明宗養子從珂弒其君自立倍密報太宗曰從

珂弒君盍討之是東丹王實啓兵端唐帝自是酣飲悲

歌形神慘沮臣下勸其親征則曰卿輩勿說石郎使我

心膽墮地其怯憊也如此冬十月丁巳夜彗星出虛危

長尺餘壬戌詔天下括馬又詔民十戶出兵一人器甲

自備契丹國志唐發民爲兵每七戶出征夫一人自備鎧仗謂之義軍凡得馬二千餘匹征夫五千人

間大擾 戊辰代州刺史張朗超授檢校太保以其屢殺敵

衆故以是命獎之癸酉幽州趙德鈞以本軍三千騎與

鎮州董溫琪由吳兒谷趨潞州十一月戊子以趙德鈞

爲諸道行營都統以趙延壽爲河東道南面行營招討

使以劉延朗副之庚寅以范延光爲河東道東南面行營招討使以李周副之帝以呂琦嘗佐幽州幕乃命齎都統官告以賜德鈞兼犒軍士琦至從容宣帝委任之意德鈞曰旣以兵相委焉敢惜死德鈞志在併范延光軍奏請與延光會合帝以詔諭延光延光不從丁酉延州上言節度使楊漢章爲部衆所殺以前坊州刺史劉景嚴爲延州留後庚子趙德鈞奏大軍至團栢谷前鋒殺蕃軍五百騎范延光奏軍至榆次蕃軍退入河東川界潘環奏隰州逐退蕃軍壬寅趙德鈞奏軍出谷口蕃軍漸退契丹主見駐柳林砦時德鈞累奏乞授延壽鎮

州節制帝怒曰德鈞父子堅要鎮州苟能逐退蕃兵要
代予位亦甘心矣若翫寇要君但恐犬兔俱斃德鈞聞
之不悅閏月丙辰日南至羣臣稱賀于行宮帝曰晉安
寨內將士應思家國矣因泣下久之丁巳以岢嵐軍爲
勝州辛酉以右龍武統軍李從昶爲左龍武統軍以前
邠州節度使楊思權爲右龍武統軍壬戌丹州刺史康
承詢停任配流鄧州時承詢奉詔率義軍赴延州義軍
亂承詢奔鄜州故有是責甲子太原行營副招討使楊
光遠殺招討使張敬達于晉安寨以兵降契丹時契丹
圍寨自十一月以後芻糧乏絕軍士毀居屋茅淘馬糞

削松栝以供餼飼馬尾鬣相食俱盡楊光遠謂敬達曰
少時人馬俱盡不如奮命血戰十得三四猶勝坐受其
弊敬達曰更少待之一日光遠伺敬達無備遂殺之與
諸將同降契丹時馬猶有五千匹契丹主以漢軍與石
敬瑭其馬及甲仗卽齎驅出塞丁卯契丹立石敬瑭爲
大晉皇帝約爲父子之國改元爲天福契丹與晉高祖
南行趙德鈞父子與諸將自團栢谷南奔王師爲蕃騎
所蹙投戈棄甲自相騰踐擠于巖谷者不可勝紀己巳
帝聞晉安寨爲敵所陷詔移幸河陽時議以魏府軍尚
全契丹必憚山東未敢南下車駕可幸鄴城帝以李崧

與范延光相善召入謀之薛文遇不知而繼至帝變色
崧躡文遇足乃出帝曰我見此物肉顛適擬抽刀刺之
崧曰文遇小人致誤大事刺之益醜崧因請帝歸京王
申車駕至河陽甲戌晉高祖與契丹至潞州契丹遣蕃
將大詳袞率五千騎送晉高祖南行丁丑車駕至自河
陽時左右勸帝固守河陽居數日符彥饒張彥琪至奏
帝不可守城是日晚至東上門小黃門鳴鞞于路索然
無聲己卯帝遣馬軍都指揮使宋審虔率千餘騎至白
馬阪言踏陣地時諸將謂審虔曰何地不堪交戰誰人
肯立于此審虔乃請帝還宮庚辰晉高祖至河陽辛己

辰時帝舉族與皇太后曹氏自燔于元武樓晉高祖入洛得帝燼骨于火中來年三月詔葬于徽陵之封中帝

在位二年年五十二

五代史闕文晉高祖引契丹圍晉安寨降楊光遠清泰帝至白鞏懷

京師父老迎帝于上東門外帝垂泣不止父老奏曰臣等伏聞前唐時中國有難帝王多幸蜀以圖進取陛下何不且入西川帝曰本朝兩川節度使皆用文臣所以明皇僖宗避寇幸蜀今孟氏已稱尊矣吾何歸乎因慟哭入內舉族自焚

史臣曰末帝負神武之才有入君之量由尋戈而踐阼慙德應深及當宁以居尊政經未失屬天命不祐人謀匪臧坐俟焚如良可悲矣稽夫衽金甲于河壩之際斧眺樓于梁壘之時出沒如神何其勇也及乎駐革輅于

覃懷之日絕羽書于汾晉之辰涕淚霑襟何其怯也是
知時之來也雕虎可以生風運之去也應龍不免爲醢
則項籍悲歌于帳下信不虛矣

舊五代史卷四十八攷證

唐末帝紀下五月辛卯以河東節度使兼大同彰國振
武威塞等軍蕃漢馬步總管檢校太師兼中書令駙
馬都尉石敬瑭爲鄆州節度使進封趙國公 案歐
陽史廢帝紀于五月以前卽書石敬瑭反與晉本紀
自相矛盾據是書五月辛卯始移敬瑭于鄆州戊戌
始聞拒命也五代春秋通鑑俱與是書同

戊戌昭義奏河東節度使石敬瑭叛 案通鑑作昭義
節度使皇甫立奏石敬瑭叛

乙卯以晉州節度使張敬達爲太原四面兵馬都部署

尋改爲招討使 案通鑑乙巳以張敬達兼太原四面排陣使丙午以爲太原四面都部署丁未又知太原行府事不言其爲招討使歐陽史又作都招討使與是書微異

捧聖第五指揮使康福進 康福進疑當作康福據冊府元龜引薛史亦作康福今姑仍其舊

誅右衛上將軍石重英皇城副使石重裔皆敬瑭之子也 案重英通鑑作重殷又通鑑攷異引廢帝實錄作姪男尙食使重又供奉官重英並與是書不同

九月甲辰張敬達奏此月十五日與契丹戰于太原城

下 案張敬達及契丹戰于太原是書晉紀作辛丑
蓋辛丑日戰越四日甲辰乃奏到也通鑑亦作辛丑
遼史作庚午與是書異歐陽史作甲辰戰于太原殊
誤

詔范延光率兵由青山路趨榆次 范延光遼史避太
宗諱作范延廣

甲子太原行營副招討使楊光遠殺招討使張敬達于
晉安寨以兵降契丹 案楊光遠降契丹歐陽史通
鑑俱作閏十一月甲子五代春秋作十一月誤

契丹主以漢軍與石敬瑭其馬及甲仗卽齎驅出塞

案遼史云所降軍士及馬五千匹以賜晉帝與是書
異通鑑從是書

丁卯契丹立石敬瑭爲大晉皇帝 案契丹立晉是書
晉高祖紀作十一月丁酉此紀作閏月丁卯前後互
異據通鑑攷異引廢帝實錄亦作丁卯蓋契丹立晉
在十一月丁酉唐人至閏十一月丁卯始奏聞也實
錄誤以奏聞之日爲立晉之日是書唐紀亦仍其誤
達喇罕舊作達刺干今改 摩哩舊作梅里今改 大
詳衮舊作大相温今改

舊五代史卷四十八攷證